

## **SOTA SOLAT NEN SAN PABLO PARA SO NONTA IRA I-ROMA**

<sup>1</sup> Si-kak si Pablo ja makasolat niyay, ja mismon inbetkag nen Jesucristo ja mansilbi son si-kato. Si-kak, shinotokan towak nen Jesucristo ja manbedin ni apostol to, say nak mengitosho nonta mapteng nga shamag ja edapo son Apo Shiyos.

<sup>2</sup> Insigod nen Apo Shiyos ja inpaisodat to so nodta ira para padto nonta bayag da iyay ya mapteng nga shamag.

<sup>3-4</sup> Sajay ya mapteng nga shamag ja naka pan-ikowan, maypangkep nonta Anak ton si Jesucristo ja Apo tayo. No sota maypangkep ni kattoo nen Cristo nonta kawasha tod ja dobong, si-kato, nay-anak shi poli nen Ari David nonta bayag da; no sota maypangkep ni kina-Shiyos to ngo, inpa-amta ni Ispirito Santo nen Apo Shiyos ey si-kato sota Anak nen Apo Shiyos ja Manakabalin. Sota inpan-ongal toy ka-sasan to ey si-kato ket Anak nen Apo Shiyos.

<sup>5</sup> Si Cristo i kabol la engaasi-an towak so nen Apo Shiyos; isonga shinotokan towak ja en mengikowan ni maypangkep son si-kato so nonta ira totoon eg maka-amta, say si-katoy pati-en sha, tan say si-katoy mayshedjaw shi emin na ili.

<sup>6</sup> Angken si-kayo ngon i-Roma, istay eg jo amta si Apo Shiyos, nem pinidi tokejon manbedin na kokowa nen Jesucristo.

<sup>7</sup> Jet niman, sajay ya solat ko, para son si-kayon tood Roma ja ensemek nen Apo Shiyos, ja pinidi ton manbedin ni too to. Jet say shawat ko son Apo Shiyos, sapay koma ta kaasi-an tokejo, tan a-shoman to sota talna ja wára son si-kayo ja edapo met laeng son Apo Shiyos ja Ametayo, tan si Apo Jesucristo.

<sup>8</sup> Iyay nin i ikowan ko son si-kayo. Naka man-iyaman son Apo Shiyos pangkep so nen si-kayo, ta eshakil la dogad i engamta ey emati kayo so nen Cristo. Jet say ikowanan ko so ni iyaman ko para son Apo Shiyos, si Jesucristo.

<sup>9</sup> Si Apo Shiyos, amta to ey no manshewatak son si-kato, kanayon na takejoka ishawati. Sajay ya si Apo Shiyos, si-katoy naka topogen pansilbi-an, ta say obdak, sota pengikowan nonta mapteng nga shamag maypangkep so nonta Anak to ja si Jesucristo.

<sup>10</sup> Jet say shawat ko ni olay son Apo Shiyos, no mebedin koma, ipalobos to koma ja metongpalak da ja ondaw shita kadnan jo.

<sup>11</sup> Tep piyan kon pasiya ja asen takejo, say ikowan ko pay koma son si-kayo sota intoro ni Ispirito Santo nen Apo Shiyos son si-kak say onkedsang i pamatiyo son Cristo.

<sup>12</sup> Aliwén si-kayo bengat, no diket say piyan kon ikowan, sajay: Sota asen kon iba-deg ni pamatiyo, si-kato ngoy pekedsang so ni pamatik; jet angken si-kayo ngo, no asen jon bima-deg i pamatik, onba-deg ngoy pamatiyo.

<sup>13</sup> Si-kayon a-akik shi pamati, eminshakil la piyan kon pasiya ja ondaw da son si-kayo, nem wára ni olay i kaontiped son si-kak; isonga ekak

da etoltoloy. Piyán kon ondaw da shita kad-an jo say onkedsang i pamatiyo jet sotan i singa kon-oren ko son si-kayo, ja inges toy edaga shi eshom ma dogad ja dinawan ko.

<sup>14</sup> Isonga eshotokanak ja manbedin ni apostol nen Cristo say ikowan koy maypangkep son si-kato so ni sapesap — sota wared siyodad ono wared shontog, sota ekayang i ashal to ono eg nan-ashal. Bilin nen Apo Shiyos iyay; isonga kapiditan na dag-en ko.

<sup>15</sup> Isonga piyan kon pasiya ja ikowan son si-kayon tood ta Roma sota mapteng nga shamag maypangkep so nen Jesucristo.

<sup>16</sup> Ta angken townen dogad ja dawán ko, ekak ibaing ja mengikowan nonta mapteng nga shamag maypangkep so nen Jesucristo, ta sajay ya mapteng nga shamag i kawad-an ni panakabalin nen Apo Shiyos. No pati-en ni too iyay, si-katoy kaysedakan sha. Jet say pilmiro nin ja insalakan nen Apo Shiyos, sota kait kon Hodiyo jet niman ma, angken si-kayon aliwén Hodiyo.

<sup>17</sup> Ekak ibaing ja mengikowan ni maypangkep son Cristo tep sotan i panshoki-an ni amta-an tayo so ey say kekosto-i so nen Apo Shiyos so ni sakey ya too ket sota kabol ni inpamati to son Cristo; enshiy eshom. Ta sajay met laeng i kaytoshongan nonta naypadto nonta bayag da, ja kowan to ey, “Sota toon kinosto-an nen Apo Shiyos ni inpamati to son si-kato, si-katoy mewad-an ni biyag ja enshiy to engintegan.” Sajay i inkowan nonta padto.

*Shosa-en ngoreshan nen Apo Shiyos sota*

### *waray basol to*

<sup>18</sup> Nem sota ira eg memati son Apo Shiyos, ja ngaaw i aramid sha, ngaaw ngoy nemnem nen Apo Shiyos son si-kara. Sota ngaaw wa aramid sha, si-katoy kaonsa-din nodta istay piyan nen Apo Shiyos ja amta-an sha koma, jet inpa-amta to ey eg to kosto sota ngaaw wa aramid.

<sup>19-20</sup> Sigod ja amtara ngo eshan i pangkep son Apo Shiyos angken nonta inkapalsowa ni dobong; isonga enshiy dason sha ja kowan sha ey eg sha amta. Ta wara sota pinalsowa nen Apo Shiyos jet si-katoy mismon amta-an sha so ey si-katoy Shiyos ja Manakabalin, angken eg sha inon-an. Emin na mebedin ni toon amta-an maypangkep son Apo Shiyos, edawag son si-kara tep inpa-amta to.

<sup>21</sup> Amta ni too ey waray Shiyos, nem eg sha koston pati-en, tan eg sha pay nemnemen i mapteng nga inpasing nen Apo Shiyos son si-kara. Anongosto ma ey bimaki iren eg ira ma maka-awat jet enshin polos i mapteng nga shaka nemnema.

<sup>22</sup> Say wared nemnem sha ma, kowan sha ey matekal ira, nem say agpayso, enshiy am-amtara.

<sup>23</sup> Si Apo Shiyos ja Manakabalin, ja wara ni olay ingkatod ingka, si-katoy anam ton panshed-jawan sha koma, nem apil et ngo mowan i shaka panshedjawa: sota sinan shiyos ja dingkara met laeng, ja singa tooy inkaleka to, ono singa titit, ono singa animal, ono singa oleg.

<sup>24</sup> Jet nontan ma si Apo Shiyos, binaybay-an to iray too, ja angken sota pipiyan shen ngaaw, si-katoy dag-en sha, angken nganton aramid;

isonga si-kara met laeng i may-eshig ey dimo-shis so ni bakdang sha.

<sup>25</sup> Jet say too, sota o-owap et ngo mowan i inonod sha ja shaka panshedjawi, ey aliwá et ta sota podnon edapo son Apo Shiyos; tan sota palsowa nen Apo Shiyos i nantalimokoshan sha ja nanshayawan, ey aliwén si Apo Shiyos ja mismon emalsowa. Na-alas i inpasing sha, ta si Apo Shiyos i nebeng komen panshedjawan ingkatod ingka. Siya, satan da.

<sup>26</sup> Jet sajay ya inpanshayaw sha, si-katoy kabol la binaybay-anan so nen Apo Shiyos son si-kara; nakol ni say too, inonod sha sota pipiyan shen dag-en ja kabebaing. Angken sota bibii mala, aliwén sota dakiy shaka kosto-in esholen, no diket sota kait sha et ngo mowan na bii.

<sup>27</sup> Angken sota ira daleki, iso met laeng i aramid sha: binaybay-an shay kalekira. Jet aliwén sota bii i piyan sha, no diket sota kait sha et ngo mowan na daleki. Jet shaka dagdag-a sota pipiyan sha ja kabebaing nga aramid so ni kait shen daki; isonga si-katoy shaka pan-ikaro niman shi bakdang sha, ta sotan i anam ni waray basol ton sajay.

<sup>28</sup> Jet nontan ma eg sha koston man-iyaman son Apo Shiyos; isonga si Apo Shiyos ngo, inbiyang to ira ja angken nankedogit i wáred nemnem sha ni olay, tan angken dag-en shay na-alas sa aramid.

<sup>29</sup> Emin na kilasin ngaaw wa aramid, wára ni olay son si-kara: sota pengang-angja ni kait, sota pengamkam ni kompormi, sota pengokes ni

kait, sota apal, sota pemono, sota pekibekal, sota pengi-owap, sota sikap, sota somang.

<sup>30</sup> Say shaka pesing pay, shaka iba-ba-ngat ja kowan sha ey ngaaw i eshom, kontra shes Apo Shiyos, shaka bebaingiy eshom; etangsit tan ma-itek pay ira, tan tima-nil la ngaaw i pangkep sha; tan endedamsis shay amesha tan inesha.

<sup>31</sup> Enshiy mapteng nga shaka ewati, eg ira mepiyal, eg sha amten mengaasi ni eshom ono ontolong.

<sup>32</sup> Angken amtaren pasiya ey inkowan nen Apo Shiyos ey sota mandeka niyay ya ngaaw wa aramid ket anam shen meshosa ingkatod ingka, si-kato pay laeng i shaka dagdag-a, jet shaka pay ikowan ey “siya kosto”, no onoran ni eshom.

## 2

<sup>1-2</sup> Say inkowan ko la, sajay. Sota toon waray basol to, anam ton meshosa. No sota mengit-neng niyay ket kowan to ey epalado noman i basol ni eshom, ja eg to ida-kam i bakdang to, enshi met laeng i to idason son Apo Shiyos, ta singa bakdang to met laeng i toka panshoishoya nontan na kowan to ey basol ni eshom. Ta iso met laeng ja nan-inges i aramid shen ngaaw. Jet amta tayo ey sota showen toon nan-inges i basol sha, nan-inges met laeng nga shosa-en nen Apo Shiyos iren showa, angken ngantoy katoora.

<sup>3</sup> Isonga sota toon emengikowan ey epaladoy basol ni eshom, eg to ngo disi-an sota shosa nen Apo Shiyos, ta angken si-kato, iso met laeng ja ngaaw i aramid to.

<sup>4</sup> Say kowan to emo, eg shosa-en nen Apo Shiyos tep na-anos si Apo Shiyos, tan masmek pay ni too; kowan to emo nem pasinsiya-an nen Apo Shiyos. Nem say nemnemen to koma, sota ebadeg ga semek nen Apo Shiyos so ni too ket piyan ton say manbebawi koma ira ni maypangkep ni basol sha.

<sup>5</sup> Nem etangken i nemnem ni too, eg sha koston manbebawi maypangkep ni basol sha; isonga singa shaka pan-olnonga i basol sha ja si-kato met laeng i keshosa-an sha, no onsabi ali sota timpon penosa nen Apo Shiyos so nonta ira nanbasol. Tep koskosto i pengigsheng ali nen Apo Shiyos,

<sup>6</sup> ja maytotop nodta dingka ni sakey tan sakey.

<sup>7</sup> Jet sota toon enganos ja nandaga ni mapteng, tep toka kamkamkamiy kay-a-tek tod dangit, ono sota kon-oren to ingkatod ingka, si-katoy may-aknan ni biyag ja enshiy to engintegangan.

<sup>8</sup> Nem sota ira eg makakosto son Apo Shiyos, ja eg memati nonta kowan to, ja say pipiyan sha et ngo mowan ket sota ngaaw wa aramid, shosa-en ali nen Apo Shiyos iren pasiya.

<sup>9</sup> Say da-kaman ni emin na toon ngaaw i aramid to, mandikat iren enshiy sha delgotan, jet say pilmiro nin son si-kara, sota ira Hodiyo, asan men sota aliwen Hodiyo.

<sup>10</sup> Nem sota ira toon mandeka ni mapteng, may-a-tek ira jet wara pay son si-karay talna. Jet say pilmiro met laeng, sota ira Hodiyo, jet asan sota ira aliwen Hodiyo ma.

<sup>11</sup> Edawag ey angken sipa, enshiy en pandesin nen Apo Shiyos ja to paboran.

<sup>12</sup> Emin ira sota toon nanbasol ja eg maka-amta nonta bilin nen Apo Shiyos, meshosa met laeng ira, nem eg maybetay nodtan na bilin. Jet sota ira maka-amta nonta bilin nen Apo Shiyos nem nanbasol, meshosa ngo ira ja maybetay nodtan na bilin.

<sup>13</sup> Sotan i pesing nen Apo Shiyos, ta aliwén sota mengitneng bengat ni bilin to i kosto-an nen Apo Shiyos so ni too, no diket sota on-onod ja tongpalen to sota bilin, sotan i kosto-an nen Apo Shiyos.

<sup>14</sup> Sota ira toon aliwén Hodiyo ja enshi son si-kara sota mismon bilin nen Apo Shiyos, waray eshom son si-kara ja shaka dekn-a met laeng ey mesepol la mandeka ira ni mapteng, jet sotan na dag-en sha, emay-enam met laeng nodta bilin nen Apo Shiyos. Si-kara met laeng i ememidin shorog ni bakdang sha, angken enshi sota bilin nen Apo Shiyos ja ememidin son si-kara.

<sup>15</sup> Jet angken enshi son si-kara sota bilin nen Apo Shiyos ja naysolat ja onoran sha, ma-sas met laeng ey wared nemnem sha sota koston kowan ni bilin, jet shi deknara, waray emengipa-amta ey ngaaw i dingkara. Nem no sina-shom, shaka dekn-a ey enshiy basol sha.

<sup>16</sup> Jet no onsabi ali sota timpo ja pengigsheng nen Apo Shiyos no sipay maysedakan, angken sota aramid sha, ono pangkep shen in-em-emot sha, po-jasan nen Cristo Jesus. Sajay ya pemo-jas nen Cristo i sakey nodta naka pan-itoro ni olay, maypangkep son si-kato.

<sup>17</sup> Jet angken sota ira kait kon Hodiyo, iso met laeng i pesing nen Apo Shiyos son si-kara. Ireka



manshinel nodta bilin nen Apo Shiyos ja wára son si-kara, jet si-katoy shaka idastog ja kowan sha ey amtara si Apo Shiyos.

<sup>18</sup> Kowan sha pay ey amtara kono no ngarantoy piyan nen Apo Shiyos ja dag-en sha, tan shaka ikowan pay ey “Siya, sotan i mapteng”, ta etod-an ira nonta bilin nen Apo Shiyos.

<sup>19</sup> Jet shaka namnama-a ey si-kara i mebedin na mengitosho so nonta ira eg maka-amta son Apo Shiyos ja may-eshig ey ekorab, tan si-karay para dawag kono ni nemnem ira nonta may-eshig ey wáred embolinget.

<sup>20</sup> Jet kowan sha ey si-karay mengitosho ni mapteng so nonta ira eg etod-an, tan kowan sha ey itod-an sha ira sota wáray kolang to ja singa a-anak. Jet shaka ikokowan ey wára sota bilin nen Apo Shiyos son si-kara, isonga kowan sha ey amtara konon emin sota podno.

<sup>21</sup> Nem sota ira Hodiyo, apil met kariy shaka pesing! Kowan sha ey mengitosho ira ni eshom, nem eg sha met itod-an i bakdang sha! Say toro sha, kowan sha ey ngaaw i mengibot, nem angken si-kara kari ket ireka mengibot!

<sup>22</sup> Jet kowan sha pay ey ngaaw i pemii, nem angken karin si-kara, ireka ememii! Kowan sha pay ey ngaaw i manshedjaw so nonta sinan shiyos, nem shaka met pankibota sota wára nodta timplo ni pagano ja istay seskigen sha koma!

<sup>23</sup> Si-karen emengilastog nonta maypangkep ni bilin nen Apo Shiyos, eg sha met onoren sota kowan nontan na bilin. Eg man-inges sota shaka ikowan tan sota shaka dagdag-a, isonga niman,

sotan i kabol la dinamsisan so ni eshom so nen Apo Shiyos.

<sup>24</sup> Sajay i kaytoshongan nonta naysolat nonta bayag da, ja kowan to ey, “Isonga ngaaw i kaikokowan ira nonta too ja aliwen Hodiyo ni maypangkep so nen Apo Shiyos, ta si-kayoy kabol.”

<sup>25</sup> No sota maypangkep ni kina-Hodiyo, istay waray pandesinan sha, no shaka koma onora sota bilin nen Apo Shiyos. Nem no eg sha onoren, enshi met laeng i silbi nonta kina-Hodiyo sha, enshi may singa kaydesinan sha so nonta ira aliwen Hodiyo.

<sup>26</sup> Sota toon aliwen Hodiyo, no si-kara et ngo mowan i emay-enam i ogadira nodta bilin nen Apo Shiyos, si-karay koston maybidang ey too ma nen Apo Shiyos.

<sup>27</sup> Jet sajay iren aliwen Hodiyo ja kostoy ogadira, angken enshin sigod son si-kara sota bilin nen Apo Shiyos, si-kara et ngo mowan i pengibetayan nen Apo Shiyos ey ebadeg i basol ira nonta Hodiyo. Ta sota ira mismon Hodiyo, ja kawad-an ni naysolat ta bilin nen Apo Shiyos, eg sha onoren sota kowan nonta bilin, nem sota ira aliwen Hodiyo et ngo mowan, nay-anam i shaka pesing nodta bilin.

<sup>28</sup> Isonga aliwen sota kina-Hodiyo i kaybidangan ni sakey ya too ey too ma nen Apo Shiyos,

<sup>29</sup> no diket say podnon too nen Apo Shiyos, sota inpanbaliw ni Ispirito Santo nen Apo Shiyos i wared poso to. Ipinshowak ey aliwen sota pengonod ni ogadi ni Hodiyo i kaybidangan ni too son Apo Shiyos. Si Apo Shiyos i mengiredjaw

nonta toon panbediw ni Ispirito Santo to, nem mebedin na eg mango ishayaw ni kait ton too.

### 3

<sup>1</sup> Sotan den inkowan ko, baka ikowan jo et ey sota ira Hodiyo, enshiy sha nandasinan, jet kowan jo ey enshiy silbi gayam nonta ogadira.

<sup>2</sup> Kina-agpayso to, eshakil i nandasinan sha so ni emin na totoo. Say pilmiro, si-karay naypiyalan nonta esel nen Apo Shiyos ja naysolat.

<sup>3</sup> Agpayson waray eshom ma kait kon Hodiyo ja eg memati nonta kowan nen Apo Shiyos, nem angken eg memati i eshom, aliwen sotan i eg itoloyan so nen Apo Shiyos nonta sigod ja bindisiyon ja inkari to so ni poli nen Abraham.

<sup>4</sup> Si Apo Shiyos, emin na kowan to, tongpalen to, angken emin na too ket ma-o-owap. Isonga waray naysolat nonta bayag da ja kowan to ey, "Sota moka itongpal so ni kowan mo, Apo Shiyos, si-katoy asanan so ni totoo ey enshiy o-owap son si-kam; si-kam ngo eshan i mengebak, angken sipen too i makakowan ey eg mo di tongpalen i kowan mo."

<sup>5</sup> Sajay met laeng i ka-osala ni eshom ni dason sha, ja kowan sha ey, "No kasta, eg shakito koma shosa-en nen Apo Shiyos tep no enshi komay kakedsel ni too, eg maykowan ey mapteng si Apo Shiyos, ta enshiy kay-eshigan to. No sotan i pesing nen Apo Shiyos, singa inba-ngat toy shosa son si-katejon totoo!" (Aliwen si-kak i makanemnem niyay; naka pan-ikowan bengat, ta si-katoy kowan ni eshom.)

<sup>6</sup> Nem arawí sotan! Si Apo Shiyos, enshiy kolang to, isonga koskostoy toka pengigsheng no sipa so ni tood ja dobong i maysedakan.

<sup>7</sup> Kowan pay ni eshom ni dason sha ey, “No sota naka pengi-owap ket si-katoy ka-amta-an ton pasiya ey si Apo Shiyos ket enshiy o-owap pa toka ikowan, apay nga kowan to ey ikarok pay laeng i inpan-owap ko?”

<sup>8</sup> Singa kowan sha ey angken mandeka kito ni basol ta say panbenagan to, panmaptengan met laeng. Say kowan kono ni eshom, sotan i mismon mika pan-itoro, nem angkena. Ta si Apo Shiyos, esaganen menosa nonta ira totoon maledamsis, jet sotan i anam ton mepesamak son si-kara.

<sup>9</sup> Jet niman, enshiy nandasinan ni Hodyos shi sango-an nen Apo Shiyos. Si-kato sota inkowan ko la, ey sapasap i toon kanayon na emanbesol — angken sipa, Hodyos ono aliwén Hodyos.

<sup>10</sup> Sajay met laeng sota kowan nonta naysolat nonta bayag da ey,

“Angken sipa, enshiy toon mapteng ni olay i toka dagdag-a;

<sup>11</sup> enshiy maka-awat nonta inpa-amta nen Apo Shiyos, enshi pay i kaonnemnem son Apo Shiyos.

<sup>12</sup> Emin na too, inbiyang sha si Apo Shiyos, jet nan-i-inges iren ngaaw i shaka dagdag-a. Angken sakey, enshiy ogadi ton naytotop shi piyan nen Apo Shiyos.

<sup>13</sup> Say eman-ekad shi bagang sha, edogit ta esel, isonga may-eshig ira ey naydiyangan ni etey ja epo-jasan. Angken pay sota shaka pekitbal, olbod. Sota esel la emanbo-day shi

bongot sha, may-eshig ey singa sota shita ni oleg, tep emeneshal ni kait shen too.

<sup>14</sup> Say shaka ikowan ni olay, sota abig tan empait ta esel.

<sup>15</sup> Jet say aramid sha pay, alisto iren menekit ni kait sha, tan angken pay bono-en sha.

<sup>16</sup> Jet angken toway toshongen sha, shaka pedigatay too nodtan, tan shaka kodo-a.

<sup>17</sup> Sota mengi-kan ni olnos ni biyag sha, eg sha amta,

<sup>18</sup> jet eg sha pay amten tekotan si Apo Shiyos.”

Sajay i kowan nonta naysolat ja bilin nen Apo Shiyos nonta bayag da,

<sup>19</sup> jet amta tayo ey sota kowan nonta bilin ja nay-awat nonta bayag da, say kaytoshongan to, sota ira toon nay-awatan to ngo ja Hodiyo. Jet say kabol la naysolatan nontan, say angken sipen too, mayda-kam ira ngo ja enshiy sha idason son Apo Shiyos, tan say amta-an pay ni emin na tood ja dobong ey wáray ikaro sha so nen Apo Shiyos ja basol sha.

<sup>20</sup> Ta angken sipen too, enshiy kosto-an nen Apo Shiyos ni kabol bengat ni pengonod to so nonta kowan ni bilin ja nay-awat nonta bayag da. Ta sotan na bilin, si-katoy mengipa-amta bengat ey wáray basol tayon totoo.

*Emin na tood ja dobong, sota pamati to son Cristo i kosto-an so nen Apo Shiyos son si-kato*

<sup>21</sup> Nem niman, inpa-sas nen Apo Shiyos so ni totoo ey aliwén sota pengonod nonta bilin nonta bayag da bengat i kosto-an to so ni too. Jet

angken sotan na bilin ja naysolat, tan sota kowan ni para padto nonta bayag da, toka ipalewag met laeng ey aliwen sotan i kosto-an so nen Apo Shiyos so ni too.

<sup>22</sup> Say kosto-an so nen Apo Shiyos so ni too, sota pamati to so nen Jesucristo. Jet sama ira Hodiyo, eg to paboran; nan-i-inges i pesing to so ni emin na too.

<sup>23</sup> Ta sapasap ja nanbasol i toon emin. Enshiy en pimosin engonod nonta kowan nen Apo Shiyos, isonga emin na too, arawi ira nodta eshiyosan na ogadi ja istay piyan to komen dag-en sha.

<sup>24</sup> Nem niman si Apo Shiyos, kosto-an shakito ta ebadeg i kaasi to, jet sajay ya kaasi to, dibshi; aliwen sobadit ni dingka tayo. Sajay i dag-en to, ta inkaro nen Cristo Jesus shi koros sota istay keshosa tayo.

<sup>25</sup> Si Apo Shiyos, ninemnem to ngo eshan ey si Cristo, metey ja maybokbok i shaletto shi koros, say emin na memati son si-kato, mepekawanan i basol sha. Sajay i dingka nen Apo Shiyos say ma-amta-an ey kosto ngo eshan i toka dagdag-a. Ta angken inpalebas to nin nontan da sota basol ni totoo ta na-anos,

<sup>26</sup> niman na etey si Cristo, inpa-sas to ey eg to mala pedabas. Jet niman ma, toka kosto-iy too no memati son Jesus.

<sup>27-28</sup> Jet enshi mala niman i tayo idastog, ta say kosto-an shakito so nen Apo Shiyos, aliwen sobadit nonta dag-en tayon mapteng ja pengonod ni bilin to. Say kowan ko, say kekosto-i so nen Apo Shiyos so ni too, sota pemati to son Cristo.

29-30 Jet nan-i-inges i Hodiyoş tan aliw n Hodiyoş ja kosto-an nen Apo Shiyos maypangkep ni pamatira. Ta si Apo Shiyos, abos ton Shiyos ja podno, jet aliw n sota Hodiyoş bengat i maka-Shiyos so, no diket Shiyos ngo met laeng ira nonta aliw n Hodiyoş.

<sup>31</sup> Sajay ya inkowan ko la, aliw n kowan ko ey ibiyang tayo sota bilin nen Apo Shiyos nonta bayag da, ja naysolat; ekak ikowan ey sina-datan niya pamati son Cristo. Enshi, arawi itan. Say agpayso, si-kamiy emengitosho ni koston olog nontan na bilin.

## 4

<sup>1</sup> Jet si Abraham ngay, ja apo tayo da nonta bayag? Ngantoy inpasing to ja kinosto-an so nen Apo Shiyos son si-kato?

<sup>2</sup> No si Abraham ket sota maypangkep ni dingka to i kinosto-an so nen Apo Shiyos son si-kato, istay w ra komay idastog to. Nem enshi; isonga angken si Abraham, enshiy to idastog son Apo Shiyos ja dingka to.

<sup>3</sup> Niman, nemnem jo kari sota naysolat nonta bayag da, ja kowan to ey, "Si Abraham, emati so nen Apo Shiyos jet sotan i kabol la kinosto-an so nen Apo Shiyos son si-kato, ja naybilangn to ey singa enshiy basol to."

<sup>4</sup> Arig to sota dagbo ni sakey ya toon nan-obda. Aliw n in-akan nonta toon nandagbo-an ja kaasi to son si-kato, no diket indigatan nonta nandagbo.

<sup>5</sup> Nem say itsora ni kepesing nen Apo Shiyos, dibshin kaasi, isonga toka ibilang sota emati son

si-kato ey singa enshiy basol sha, angken say kinapodno to ket ebadeg i basol sha. Nem sotan na too, mesepol la manshinel ira son Apo Shiyos, ja eg manshinel nonta dingkara, ey si-katoy kosto-an so nen Apo Shiyos son si-kara.

<sup>6</sup> Jet angken si Ari David nonta bayag da, inges niyay met laeng i kowan to. Inkowan to ey say too ja inbilang nen Apo Shiyos ja singa enshiy basol to, man-imdeng ma, ta sota inpangaasi nen Apo Shiyos son si-kato, aliwén sobadit iyay ni dingka to.

<sup>7</sup> Say insolat nen Ari David, sajay: “Man-imdeng sota toon epakaʻwanan i basol to, ta may-eshig ey sotan na basol to, singa enshi mala.

<sup>8</sup> Man-imdeng sota toon eg ibilang ma nen Apo Shiyos sota basol to.” Kowan nen Ari David.

<sup>9</sup> Jet iyay pay i piyan kon nemnemen jo. Sajay ya inkowan nen Ari David maypangkep ni pan-imdeng, ja inkaasi nen Apo Shiyos, aliwén na para so ni Hodiyo bengat, no diket pati sota ira aliwén Hodiyo, mayda-kam ira ngo. Tayoka pati-a ey sota pamati nen Abraham i inbilang so nen Apo Shiyos son si-kato ey singa enshiy basol to.

<sup>10</sup> Nem nontan, aliwa nin na maykowan ey Hodiyo si Abraham, ta eg pay laeng ekogit. Nem sigod ja inbilang ngo eshan nen Apo Shiyos ey singa enshiy basol nen Abraham,

<sup>11</sup> jet idi in-onod ton mekokit, say olog nontan, sigorado ma ey si-kato ket too ma nen Apo Shiyos. Nem kinosto-an na sigod nen Apo Shiyos si Abraham nonta inpamati to son si-kato. Say



kabol la dingka-an so nen Apo Shiyos so niyay, say si Abraham i panbedin to ja ama ni emin na memati ali. Angken sota ira aliwén Hodiyo ja eg ekogit, ibilang nen Apo Shiyos ira ngo ey enshiy basol sha.

<sup>12</sup> Si Abraham met laeng i ama ira nonta Hodiyo ja imonod so ni ogadi ja kogit, nem aliwén sota inkakogit sha i nayda-kaman sha son Abraham, no diket mesepol la memati ngo ira ja onoran shes Abraham ja apo tayo da, ta emati ngo eshan si Abraham nonta aneng i i-onod to so nonta ogadi ni Hodiyo ja kowan sha ey kogit.

<sup>13</sup> Sota inkari nen Apo Shiyos so nen Abraham nonta bayag da ey si-kato tan sota poli to ali i ontawid so niya dobong, aliwén na nay-awat son si-kato ja sobadit nonta inpangonod to so ni bilin nen Apo Shiyos ja nay-awat so ni Hodiyo. No diket say kabol la inkari-an to so, sota inpamati nen Abraham son si-kato. Sotan i kinosto-an son Apo Shiyos son si-kato.

<sup>14</sup> Ta no bilang ey say i-awatan so nen Apo Shiyos so nonta dobong ja inkari to ket sota emengonod so nonta bilin ja nay-awat so ni Hodiyo, eg to tongpalen i kari to gayam. Jet angken sota pamati son Cristo, enshiy silbi to, no sotan i pesing nen Apo Shiyos.

<sup>15</sup> Enshiy eshom ma tayo tinewid shima bilin na nay-awat so ni Hodiyo nem eg sota keshosa ali ni totoon eg imonod so. Sajay i itsora ni angken nganton bilin, ta no waray amtam ma bilin, ey eg mo onoren, basol mo.

<sup>16</sup> Isonga sota kari nen Apo Shiyos, in-awat to son Abraham tep emati son si-kato. Sotan i

inpasing nen Apo Shiyos ta piyan ton kaasi-an si Abraham. Jet aliwen sota emengonod ni bilin ja nay-awat so ni Hodiyo bengat i maybidang ey poli to, no diket angken sota ira memati ja inges toy inpasing nen Abraham, mayda-kam ira ngo. Ta si-katoy ametayon emin shi pamati.

<sup>17</sup> Owen, si-katoy ametayon emin ja emati, jet naytotop iyay nodta naysolat nonta bayag da ja kowan to ey, “Si-kam Abraham i panbedin kon ama ni tood ka-ili-ili.” Si Apo Shiyos i makakowan niyay, isonga amta tayo ey si-katejon emati, shakitoka ibilang ey poli nen Abraham, ta angken si Abraham, emati son Apo Shiyos ja ememiyag nonta nanketey, tan emengikowan ey mepalsowa i angken nganto, jet siya, emayto-to-wa.

<sup>18</sup> Si Apo Shiyos, inkari to son Abraham ey mebonat sota poli to. Isonga si Abraham ja istay enshiy namnama ton on-anak si asewa to tep eba-kol ma, pinati to sota inkowan nen Apo Shiyos jet isonga ewad-an ni namnama.

<sup>19</sup> Singa eg mebedin men mengipotot, nem makedsang ngoreshan i pamati to, angken na edakay ya pasiya (tep say tawen to nontan, sandasos ma), tan angken si Sara ja asewa to ket kowan sha ey basig.

<sup>20</sup> Nem nontan, makedsang ngo eshan i pamati to ja enshiy showashowa to maypangkep nonta kari nen Apo Shiyos son si-kato. Eg kimapoy i pamati to; intoltoloy to ngoreshan ja nanshayaw so nen Apo Shiyos.

<sup>21</sup> Ta ebadeg i namnama to ey sota kari nen Apo Shiyos son si-kato, kabaalan ton dag-en.

<sup>22</sup> Isonga sota pamati to i inbilangan so nen Apo Shiyos son si-kato ey enshiy basol to.

<sup>23</sup> Sota naysolat nonta bayag da, jey inbilang nen Apo Shiyos si Abraham ey enshiy basol to, aliwén naysolat maypangkep son si-kato bengat,

<sup>24</sup> no diket si-katejo ngo ket maybidang kito ngo ey enshiy basol tayo, no memati kito son Apo Shiyos ja inpan-ongal so nen Jesus ja Apo tayo.

<sup>25</sup> Si Jesus, intolok toy bakdang ton metey shi koros say ikaro toy basol tayo, tan nanbiyag mowan say mebedin na kosto-an shakito ma nen Apo Shiyos no memati kito son Cristo.

## 5

<sup>1</sup> Niman ma, ta emati kito so nen Cristo, kinosto-an shakito ma nen Apo Shiyos jet mapteng may pengidmang nen Apo Shiyos son si-katejo; eg shakito ma shosa-en. Sajay i kabol la eteyan nen Jesucristo ja Apo tayo shi koros;

<sup>2</sup> jet niman, si-katoy nayda-kaman tayo nodta kaasi nen Apo Shiyos ni inpamati tayo son si-kato. Jet kitoka ma man-imdeng nodta namnama tayo ja mayda-kam so nen Apo Shiyos shi dangit.

<sup>3</sup> Jet aliwén sotan bengat, no diket kitoka pay eman-imdeng nonta digat niman ja tayoka da-da-kami, ta amta tayo ey no enosan tayo jay ya digat, onkedsang i nemnem tayo, say eg kito ma-ebak no wára pay i onsabin digat,

<sup>4</sup> jet no amta-an tayon man-enos ni olay, man-imdeng si Apo Shiyos son si-katejo. Jet no sigoradon amta tayo ey man-imdeng si Apo Shiyos son si-katejo, waray namnama tayo ey

shi ma-onod alin timpo, mapteng nga pasiya i panbenagan tayo.

<sup>5</sup> Jet sota tayoka namnama-a ja tayoka sesseskera, agpayson tongpalen nen Apo Shiyos, ta ebadeg ga pasiyay semek to son si-katejo. In-akan nen Apo Shiyos i Ispirito Santo to son si-katejo, isonga amta tayo ey ebadeg i semek to son si-katejo.

<sup>6</sup> Enshin polos ngo eshan i mebedin na dag-en tayon kaysedakan tayo tep ebadeg i basol tayo. Nem idi simabi sota koston timpo, etey si Cristo shi koros para son si-katejon totoo ja istay eg memati son Apo Shiyos.

<sup>7</sup> Manmano son si-katejon too i masi-met ta metey angken para so nonta eshiyosan na too.

<sup>8</sup> Nem si Cristo etey para son si-katejo nonta eg pay laeng epakawananan sota ebadeg ga basol tayo. Sotan i amta-an tayo so ey ebadeg i semek nen Apo Shiyos son si-katejo.

<sup>9</sup> Sota naybokbok ka shala nen Cristo nonta inkatey to shi koros i kaybidangan tayo ma ey singa enshiy basol tayo; isonga waray namnama tayo ma ja isalakan shakito no onsabi sota timpon penosa nen Apo Shiyos so nonta ira eg emati.

<sup>10</sup> Agpayso ey nonta pilmiro, endedamsis tayos Apo Shiyos, isonga eg shakito kosto. Nem idi etey sota Anak to shi koros, ja inkaro toy basol tayo, mapteng ma, enshi la sota istay inkaysi-jan tayo son Apo Shiyos. Sigod ja naysi-jan kito son si-kato, nem intolok ton etey sota Anak to para son si-katejo, jet sigorado men amta tayo

ey maysedakan kito ma shi anongosto tep wáres Cristo shi biyag ja emengibediw son si-katejo.

<sup>11</sup> Aliwén na say pan-imdengan tayo bengat ket sota eg tayo ma keshosa, no diket kitoka man-imdeng ta wára kito son Apo Shiyos niman na na-olnos sota istay inkaysi-jan tayo son Apo Shiyos. Si Jesucristo ja Apo tayo, si-katoy dimaga so niyay; isonga nay-esop kito ma son Apo Shiyos.

*Si Cristoy engipatewid ni biyag ja enshiy to engintegan*

<sup>12</sup> Apay nga wáray basol shiya dobong? Say nanshogi-an to, sota sakey ya too nonta bayag da ja si Adan. Si-katoy kabol la ewára-an ma ni patey shiya dobong. Manipod nontan ingkato niman, emin na too, kenshat ta metey ira ta sapasap pa nanbasol.

<sup>13-14</sup> Angken nonta bayag da ja eg pay laeng in-awat nen Apo Shiyos sota bilin to so nen Moises, ngaaw ngo eshan i kedagdag-a ira ni totoo. Jet basol sha ngo sotan; nem eg maybidang ey inges toy basol ira nonta nay-awatan ni bilin nen Apo Shiyos. Si Adan nonta pilmiro, si-katoy sakey ya nay-awatan ni bilin nen Apo Shiyos, jet manshoki son Adan, ingkato so nen Moises, na-amta-an ngo eshan ey wáray basol sha tep etey ngo met ira.

Si Adan, wáray singa kay-ingesan to son Cristo ja na-onod ja dimaw ali, ta wáray inpatewid shen showa so ni totoo.

<sup>15</sup> Nem sota kaasi nen Apo Shiyos ja inpatewid nen Jesucristo, tan sota basol, ja inpatewid ngo

nen Adan, arawin enshiy sha nan-ingesan. Ta agpayson eshakil i emetey maypangkep ni basol ja inpatewid nen Adan, nem ebadbadeg ngo eshan sota kaasi nen Apo Shiyos ja memekawan ni basol, jet eshakil i totoon nayda-kam nodta kaasi to.

<sup>16</sup> Jet na-apil ngon pasiya i nanbanagan ni basol nen Adan, tan sota kaasin edapo so nen Cristo, ta nonta nanbasol sota sakey ya too, say nanbanagan to, istay meshosen emin i totoo, tep sapesap iren nanbasol. Nem angken ngaaw i dingdingkara, ebadeg ngo eshan i kaasin edapo so nen Cristo, jet say nanbanagan to, kinosto-an ma ira nen Apo Shiyos et inbilang to ey singa enshiy basol sha ma.

<sup>17</sup> Isonga no maypangkep nonta basol nonta sakey ya too ja si Adan, emin ma ja too, kenshat ta metey, manshoki nontan ingkato niman. Sotan i nanbanagan nonta aramid nen Adan. Nem say nanbanagan nonta aramid nonta sakey ya too ja si Jesucristo, mayda-kam ira so nen Jesucristo sota totoon ibilang to ey enshiy basol sha, no onsabi ali sota badon biyag.

<sup>18</sup> Sotan na basol ni sakey ya too, ja si Adan, si-katoy kabol la istay shosa-an so nen Apo Shiyos so ni emin na totoo. Nem si Cristo, pinati ton emin i bilin nen Apo Shiyos ingkato nonta eteyan to shi koros, jet sotan na inpasing to ngo, si-katoy ibilangan so nen Apo Shiyos so ni emin na too ey singa enshiy basol sha, jet i-aknan to ira ni biyag.

<sup>19</sup> Sota sakey ya too, ja si Adan, eg to pinati sota kowan nen Apo Shiyos, jet si-katoy kabol la

nayda-kaman ni emin na totoo ni basol. Nem sota sakey ya too ja emati nonta kowan nen Apo Shiyos, ja si Cristo, si-katoy kabol la ibilangan so nen Apo Shiyos so ni eshakel la totoo ey singa enshi may basol sha.

<sup>20</sup> Nonta nay-awat sota bilin nonta bayag da son Moises, singa inparakel to et i basol ni too tep inamta-an sha sota bilin nen Apo Shiyos, nem eg sha inbi-jag sota shaka dagdag-a ja ngaaw. Nem angken na emanba-deg nontan i basol tan emankaiweshis, mas ebadbadeg ngo eshan i kaasi nen Apo Shiyos.

<sup>21</sup> Agpayso ey say singa enanngel ni biyag ni emin na totoo ket sota basol, isonga waray patey. Nem niman ma, sota kaasi nen Apo Shiyos, si-katoy mengebak ja mengi-kan ni biyag ja enshiy to engintegan so nonta ira toon toka kosto-i. Jet sajay ya toka isalakani son si-kara, emedepo son Jesucristo ja Apo tayo.

## 6

*Kinaasi-an shakito nen Apo Shiyos, nem aliwen piyan ton a-selen ey bolos may panbesol*

<sup>1</sup> Jet sotan den inkowan ko, baka ikowan jo et ey mapteng no itoltoloy tayon manbesol, ta no onba-ba-deg i basol, ma-ma-shoman i kaasi nen Apo Shiyos.

<sup>2</sup> Nem enshi! Arawi itan na nemnem. Say agpayso, enshi may bibiyang tayon manbesol ja inges to sota etey ja eg ma manbesol.

<sup>3</sup> Amtayo met ey nonta ebonjagan kito ja nayda-kam son Cristo Jesus ket ebonjagan kito ngo ja nayda-kam ni inkatey to.

<sup>4</sup> Sota inpanbonjag tayo, say kay-eshigan to, singa etey kiton nayda-kam so nen Cristo ja naybeka. Jet say sakey pay ja kay-eshigan ni inpanbonjag tayo, singa nayda-kam kito so nen Cristo nonta inpanbiyag so nen Apo Shiyos maypangkep ni panakabalin to, say mebedo-an ngoy biyag tayo niman na wára kitod biyag.

<sup>5</sup> Ta no si-katejo ket nayda-kam kiton singa etey, ja kadwa nen Cristo, mayda-kam kito met laeng son si-kato ja man-ongal ja inges to.

<sup>6</sup> Amta tayo met ey sota sigod ja ogadi tayo nonta eg kito pay laeng emati ket singa ekilansa sotan na ogadi so nen Cristo shi koros, say sotan na ngaaw wa aramid ni bakdang tayo, mesa-datan, jet aliwen sota basol ma i ontengel son si-katejo.

<sup>7</sup> Singa kowinta ey etey kito jet amtayo ey say etey ya too ket eg mebedin na manbesol tep etey ngarod.

<sup>8</sup> Nem no etey kito ja nayda-kam so nen Cristo, waray shinel tayo ey mayda-kam kito ngo ali ja mekibiyag son si-kato.

<sup>9</sup> Ta amta tayo ey si Cristo, nanbiyag shi patey jet eg ma metmetey, ta sota patey, enshiy to naybiyangan son si-kato.

<sup>10</sup> Say kabol la eteyan to, say ikaro toy basol ni totoo, jet etey ni pinsak bengat para so ni emin na too. Nem sota biyag ja wára son si-kato ma niman, para sota kayshedjawan nen Apo Shiyos.



<sup>11</sup> Isonga angken si-kayo, ibidang jo ngoy bakdang jo shorog ey etey kayo da ja enshiy jo kaybiyangan ni basol, nem nemnem jo ngo ey ebiyag kayo met laeng para sota kayshedjawan nen Apo Shiyos maypangkep ni pamatiyo so nen Cristo Jesus.

<sup>12</sup> Karejo ipalobos ja sota basol i mengebak son si-kayo, say eg jo onoren sota pipiyan ni bakdang jo ja ngaaw;

<sup>13</sup> karejo itolok shorog i bakdang jon mandeka ni ngaaw wa aramid, no diket say dag-en jo koma, itodok jon osalen shakejo nen Apo Shiyos ja mansilbi met laeng son si-kato ni pandeka ni mapteng. Ta si Apo Shiyos i engi-kan ni biyag son si-kayo nonta singa etey kayo.

<sup>14</sup> Nemnem jo ey enshiy pesing ni basol son si-kayo, ta say kasesaad jo niman, wára kayo ma son Apo Shiyos ja kinaasi-an shakejo; isonga sota kaysedakan tayo ket eg maybetay nodta pengonod tayo nonta bilin ja nay-awat nonta bayag da.

<sup>15</sup> Nem eg jo koma ikowan ey, “Angken manbesol kito, sagang mango et aliwén sota pengonod ni bilin i kaysedakan tayo, nem eg sota kaasi nen Apo Shiyos son si-katejo.” Nem enshi! Arawi itan na nemnem!

<sup>16</sup> Amtayo met ey no ngantoy naydowaman jon dag-en, sotan i singa enanngel son si-kayo. Isonga no naydowam kayon manbesol, singa sotan i enanngel son si-kayo. Jet say panpa-no-an ni joka panbesbesol, patey ja enshiy to engin-tegan. Nem no naydowam kayon memati son Apo Shiyos, say panbenagan jo, ewaten shakejo

nen Apo Shiyos jet maybidang kayo ma ey enshiy basol jo.

<sup>17</sup> Nontan da, naydowam kayon manbesol, nem niman, man-iyaman kito so nen Apo Shiyos, ta say pinatiyon nay-edet shi poso jo ma, sota koston toro, jet si-kato may joka on-onora ni olay.

<sup>18</sup> Jet niman ma, enshiy pesing ni basol ja menngel son si-kayo, ta say singa nanngel son si-kayo niman, naydowam kayon mandeka ni piyan nen Apo Shiyos.

<sup>19</sup> (Saja inosal kon esel, sota nam-ay ya esel la tayoka osala ni olay, tep si-katoy nam-ay ya ewatan tayon too.) Nontan da sota bakdang jo, joka osala ja mandeka ni ensekig ga aramid, jet emankema-ma sotan na aramid jon ngaaw. Nem niman ma, baliwiyo, osal jo ta bakdang jo ja mandeka nonta piyan nen Apo Shiyos, say mapteng ni olay i dagdag-en jo.

<sup>20</sup> Nontan da, naydowam kayon manbesol, isonga eg jo ngo nemnemen ja mandeka ni mapteng nga aramid ja kekosto-i nen Apo Shiyos.

<sup>21</sup> Nem enshi met i jo kinon-od ja mapteng nodta dingdingkayo nontan da, ja si-katoy joka ibebaing niman. Patey ingkatod ingka i panpa-no-an ni inges ira nontan na aramid.

<sup>22</sup> Nem niman ma ja aliwen basol i timen-gel son si-kayo, si Apo Shiyos i naydowaman jon onoren, jet asdeg to may kinon-od jo tep emanmapteng may ogadiyo, ja mebedin na waray kay-ingesan to son Apo Shiyos. Jet say panpa-no-an niyay, mewad-an kayo ni biyag ja enshiy to engintegan.

<sup>23</sup> Isonga say sobadit ni basol, patey ingkatod ingka, nem wáray dibshin i-akan nen Apo Shiyos son nonta ira wára son Cristo Jesus ja Apo tayo; si-kato sota biyag ja enshiy to engintegan.

## 7

<sup>1</sup> Si-kayon a-akik shi pamati, iyay pay i piyan kon ikowan son si-kayo ja toloy nonta inkowan ko la. Sigosho ewáten jo iya piyan kon ikowan tep amtayo met sota bilin nen Apo Shiyos ja naysolat nonta bayag da. Say piyan kon ikowan son si-kayo, sajay. Say penongpal ni too nonta bilin nonta bayag da, sota kawasha to pay laeng shiya biyag; nem no metey, enshi ma.

<sup>2</sup> Kaspangarigan, sota biin wáray asewa to, kapiditan na tongpalen to sota bilin maypangkep ni san-asewa, tep sota asewa ton daki, mabiday pay laeng. Nem no metey sota daki, angken eg to ma tongpalen sota bilin pangkep ni san-asewa.

<sup>3</sup> Nem no sotan na bii ket wáray apil la daki to, angken na wára sota sigod ja asewa to shi biyag, ikowan sha ey ekileki sotan na bii. Nem no etey sota asewa ton daki, asan maki-sawa mowan, eg sha ikowan ey daki to bengat sotan na maykadwen asewa to.

<sup>4</sup> Sajay i may-eshig son si-kayon a-akik shi pamati. Singa etey kayo ta enshiy jo kaybiyangan nonta bilin ja naysolat nonta bayag da. Ta nonta etey i bakdang nen Cristo, singa angken si-kayo, etey kayo ngo. Jet si-katoy makatoo son si-kayo. Ta angken etey nontan da, nanbiyag mowan say mebedin na tongpalen jo sota sigod ja piyan nen Apo Shiyos ey dag-en jo.

<sup>5</sup> Nonta eg kito pay laeng emati son Cristo, sota ngaaw wa pipiyan ni bakdang tayon dag-en, si-katoy tayoka dagdag-a ni olay. Jet singa pay ya inpaba-deg bengat nonta bilin nonta bayag sota tayoka dagdag-a ja ngaaw. Nakol ni istay patey ingkatod ingka i panpa-no-an tayo.

<sup>6</sup> Nem niman ma, ewaya kito tep aliwen kapiditan na tongpalen tayo sota bilin nonta bayag da. Singa etey kito tep enshiy bibiyang tayo nodtan na bilin. Nontan den eg kito pay laeng emati son Cristo, istay sota bilin nonta bayag day tongpalen tayo koma. Nem niman men badoy biyag tayo, kitoka mansilbi son Apo Shiyos jet sota Ispirito Santo nen Apo Shiyos i emengitoshong son si-katejo.

*Sota bilin nonta bayag da, eg to kabaalan na mena-dat ni ngaaw wa ogadi ni too*

<sup>7</sup> Sajay ya inkowan ko la, aliwen kowan ko ey sota bilin nen Apo Shiyos nonta bayag da ja naysolat ket singa emengi-kan ni panbesolan. Enshi, arawi sotan na nemnem. Nem no enshi met kitdi sotan na bilin, istay ekak amta sota maypangkep ni basol. Kaspangarian sota pengamkam, istay ekak amta ey sota pengamkam ket basol gayam, no eg inkowan nonta bilin ey, "Karam kamkaman i kokowa ni eshom."

<sup>8</sup> Nem idi inamta-an ko sotan na bilin, ema-ma sota sigod ja ngaaw wa wared nemnem ko, jet kinamkaman koy angken nganto. No enshi koma sota sigod ja bilin, istay eg tayo inamta-an i basol.

<sup>9</sup> Nontan da, angken si-kak naka manbibiyag ja ekak amta sota maypangkep nonta sigod ja bilin jet ekak panshanagan i emin na naka dagdag-a. Nem idi simabi ali sotan na bilin son si-kak, singa ebangon sota sigod ja ngaaw wa wáred nemnem ko jet inamta-an ko may basol. Jet nontan i in-amtak so ey meshosa gayam ingkatod ingka sota toon manbesol.

<sup>10</sup> Isonga sotan na bilin ja istay mengitoshong ni too koma shi biyag, sotan et ngo mowan i singa keshosa-an to.

<sup>11</sup> Kowan ko nem biyag i panpa-no-an ko ni pengonod ko nonta sigod ja bilin, nem apil gayam! Sotan et i engamta-an ko ey patey i panpa-no-an ko. Isonga singa sinaol towak nonta sigod ja ngaaw wa wáred nemnem ko nonta inamta-an ko so nontan na bilin.

<sup>12</sup> Sota bilin nen Apo Shiyos nonta bayag da ja naysolat, mismon edapo so nen Apo Shiyos; enshiy kolang to, mapteng nga emin.

<sup>13</sup> Jet aliwén na kowan ko ey sotan na mapteng ket si-katoy emono son si-kak. Arawi sotan na nemnem. Say singa emono son si-kak, sota sigod ja ngaaw wa wáred nemnem ko. Jet say nanbanagan niyay, inamta-an koy maypangkep nonta sigod ja wáred nemnem ko. Ta nonta inamta-an ko sota sigod ja bilin, inamtak ma ey sota ngaaw wa wáred nemnem ko ket basol la embel-at ta pasiya gayam.

<sup>14</sup> Amta tayo ey sotan na bilin nen Apo Shiyos ja naysolat nonta bayag da ket mapteng ta edapo met laeng son si-kato. Nem si-kak, too-ak bengat. Saja sigod ja ngaaw wa wáred nemnem ko,

si-katoy emengitoshong son si-kak ni olay; isonga naka dagdag-a ni olay sota pipiyan ni bakdang ko ja ngaaw.

<sup>15</sup> Ekak ewatan shorog i bakdang ko, ta sota piyan kon dag-en, aliwen si-kato, no diket say naka dag-a et ngo mowan, sota mismon ekak kosto.

<sup>16</sup> No ekak koston dag-en sota ngaaw wa naka dagdag-a, sotan i ka-anta-an to ey naka enogota ey mapteng sota bilin nen Apo Shiyos. Ta eg to ngo kostoy ngaaw.

<sup>17</sup> Si-kak, piyan koy mapteng, isonga singa aliwen si-kak ma i emandeka ni ngaaw wa naka dag-a, nem wára met laeng i sigod ja ngaaw wa wáred nemnem ko, jet si-katoy kabol la naka panbesoli.

<sup>18</sup> Amtak ey no ekak emati son Cristo, enshin polos i mapteng son si-kak. Niman, makedsang mangoy nemnem kon mandeka ni mapteng, nem iso met laeng nga eg kabaalan ni bakdang kon dag-en.

<sup>19</sup> Ekak dag-en sota mapteng nga piyan kon dag-en, nem say naka dag-a et ngo mowan, sota ngaaw wa ekak kosto.

<sup>20</sup> Jet no dag-en ko sota ekak kosto, sajay i ka-asan to ey aliwen si-kak i emandeka niyay, no diket sota sigod ja ngaaw wa wáred nemnem ko.

<sup>21</sup> Singa kenshat et ta no piyan kon mandeka ni mapteng ket sota ngaaw et bengat i naka dagdag-a.

<sup>22</sup> Say epigsen wáred nemnem ko, sota pengonod ni bilin nen Apo Shiyos,

<sup>23</sup> nem wáray eg man-inawatan shiya bakdang ko. Sota wáred nemnem ko, kowan to ey mandeka-ak ni mapteng, nem apil i kedag-a niya bakdang ko, jet sota piyan niya bakdang koy emengebak ni olay; nakol ni naka manbesol.

<sup>24</sup> Ara! Kakaasiy kasesaad kon too! Istay enshiy mengisedakan niya bakdang ko ja ontorong shi patey,

<sup>25</sup> nem niman ebadeg i iyaman ko so nen Apo Shiyos ta insalakan towak maypangkep so nen Jesucristo ja Apo tayo!

Isonga sajay nin i kasesaad ko: no shi nemnem ko, naka mansilbi son Apo Shiyos, nem saja bakdang ko, ememasig i toka panbesol.

## 8

*Sota Ispirito Santo nen Apo Shiyos bengat i onbaal ja mena-dat ni ogadi*

<sup>1</sup> Owen agpayso, angken saman i kakapoy ni bakdang tayo, eg shakito shosa-en nen Apo Shiyos, basta wara kito et so nen Cristo Jesus.

<sup>2</sup> Ta wára son si-katejo sota Ispirito Santo to jet si-katoy engi-kan ni biyag son si-katejo niman na emati kito son Cristo Jesus. Si-kato ma niman i emengitoshay son si-kayo; isonga ewaya kayo ma ja aliwén basol i timengel son si-kayo, jet aliwén patey ingkatod ingka i panpa-no-an jo.

<sup>3</sup> Sota kowan nonta bilin nen Apo Shiyos ja naysolat nonta bayag da ket eg kabaalan ni toon tongpalen na emin sotan tep ekapoy i too. Isonga sotan na bilin, eg to kabaalan na mengisedakan ni too. Nem si Apo Shiyos, say inpasing to ja

mengisedakan son si-katejo, inbetkag to ali sota Anak to, jet nay-inges i bakdang tod bakdang tayo, nem say nay-apilan ni bakdang tayon too, mabesol i bakdang tayo. Jet sotan na Anak to, si-katoy engikesho nonta basol tayo. Siya, idi etey sota bakdang nen Cristo, na-abak i basol; enshi malay kedsang ton ontengel ni too.

<sup>4</sup> Si Apo Shiyos, inbetkag to alis Cristo say kabaalan tayon menongpal nonta kowan ni bilin to. Jet siya, tayoka nemnema ma niman sota pengonod ni kowan ni Ispirito Santo nen Apo Shiyos, aliwén sota sigod ja nemnem tayo nonta eg kito pay laeng emati.

<sup>5</sup> Apil i wáred nemnem nonta ira emengonod nonta sigod, ta say wára ngod nemnem sha ni olay, sota naydowaman shen dagdag-en ja ngaaw; tan apil ngo sota emengonod nonta kowan ni Ispirito Santo nen Apo Shiyos, ta say wára ngo ni olay shi nemnem tayo, sota piyan ni Ispirito Santo ja dag-en tayo.

<sup>6</sup> Sota toon say toka nemnemnema ket sota naydowaman ton dag-en ja ngaaw, say panpa-no-an to, patey ingkatod ingka; nem sota toon say toka nemnemnema ket sota pengitoshong ni Ispirito Santo nen Apo Shiyos son si-kato, say kon-oren to ali ngo, biyag ja enshiy to engintegan, tan kon-oren toy talna.

<sup>7</sup> Ta sota toon say toka nemnemnema ket sota naydowaman ton dag-en ja ngaaw, emaykontra so nen Apo Shiyos. Ta eg sha pati-en sota bilin nen Apo Shiyos, jet kenshat ta sotan ni olay, eg mebediwan.

<sup>8</sup> Jet sota ira emengonod ni olay ni naydowa-



man ni bakdang shen dag-en ja ngaaw, eg sha mebedin na mandeka ni pan-imbangan nen Apo Shiyos.

<sup>9</sup> Nem si-kayo, aliwén say joka on-onora ket sota sigod ja nemnem jo nonta eg kayo pay laeng emati, no diket sota pengitoshong ni Ispirito Santo nen Apo Shiyos. Ta agpayson sota Ispirito Santo nen Apo Shiyos ja wára son si-kayo ket si-katoy emengitoshong son si-kayo. Nem sota ira enshiy Ispirito nen Cristo son si-kara, enshi ngo ira so nen Cristo;

<sup>10</sup> singa etey ira. Jet angken si-kayo ngo nontan, singa etey kayo kabol ni basol jo, nem niman, ewad-an kayo ngo eshan ni badon biyag ta kinosto-an shakejo ma nen Apo Shiyos ni inpatiyo son Cristo.

<sup>11</sup> No sota Ispirito nen Apo Shiyos ket wára son si-kayo, si-kato met laeng i mengi-kan ni biyag nonta bakdang jo ja emetey, ta si-kato ngoy engi-kan ni biyag son Cristo nonta inkatey tod koros, jet sotan na Ispirito, wára son si-kayo.

<sup>12</sup> Si-kayon a-akik shi pamati, niman ja ewad-an kito ni Ispirito Santo nen Apo Shiyos, waray kapiditan na dag-en tayo, nem aliwén sota pengonod nonta sigod ja nemnem tayo nonta eg kito pay laeng emati.

<sup>13</sup> Ta no sotan i onoren jo, say panpa-no-an to, patey ingkatod ingka; nem no sota pengitoshong ni Ispirito Santo nen Apo Shiyos i onoren jo, mebedin jon ibi-jag sota ngaaw wa aramid jo, jet sota biyag ja medepo son Apo Shiyos i maysa-dat.

<sup>14</sup> Sota ira toon kaitorong ni Ispirito nen Apo Shiyos, si-karay annak nen Apo Shiyos.

<sup>15</sup> Jet sota Ispirito Santo ja inewát jon edapo so nen Apo Shiyos, aliwén panbedin shakejo mowan ni singa baga-en; marinel kayo ma, enshiy jo itakot ja shosa ali, no diket sota Ispirito Santo nen Apo Shiyos ja inewát jo, si-katoy naybilangán jo ma ey annak tokejo. Jet si-katoy kabol la tayoka ingadni so ma ey si Apo Shiyos i Ametayo.

<sup>16</sup> Waray kepedekna ni Ispirito Santo nen Apo Shiyos shi nemnem tayo ey annak shakito nen Apo Shiyos.

<sup>17</sup> Jet niman ma, ta annak shakito nen Apo Shiyos, mayda-kam kiton mekitewid son Cristo nodta i-akan nen Apo Shiyos: mayshedjaw kito ngo shi dangit ja kait nen Cristo. Mayda-kam kito nodtan, ta kitoka manda-kam ngo ni digat niman kabol ni tayoka pengonod son si-kato, ja singa kitoka mekilikat son si-kato.

<sup>18</sup> Saja digat niman na tayoka da-da-kami, kowan tayo ey palado, nem say kowan ko, singa engka-jas kari ta ebadbadeg aliy ewaten tayod dangit, ja sobadit niyay ya digat. Jet shiman i amta-an tayo so no ngarantoy itsora to.

<sup>19</sup> Emin na palsowa, shaka segsegshen pasiya sota pengipa-sas ali nen Apo Shiyos nonta kaskasshaaw wa panbedinan tayo ali ja annak to.

<sup>20</sup> Ta emin na palsowa, sapasap ja singa eg nin maytotop nodta epalsowa-an sha. Aliwén ka-way shen engigsheng ni mebedin na dag-en sha, no diket si Apo Shiyos i makanemnem so, ta sigod ja ninemnem ton mapteng aliy panbedinan sha.

<sup>21</sup> Ta angken saja emin na palsowa, onsabi ali sota timpon kayda-kam sha ngo nonta ira annak nen Apo Shiyos. Singa mebodos ira ngo ta eg ira ma mantoshong shi ketoytoyana sha, jet wára ngo ma ira shi wáya ja enshiy to kay-ingesan.

<sup>22</sup> Amta tayo ey ingkato niman, emin na palsowa, sapa sap ja ireka man-a-agag ja memeshas nonta sigod ja ninemnem nen Apo Shiyos ja medeka son si-kara.

<sup>23</sup> Nem aliwén saja ira palsowa bengat i eman-a-agag, no diket angken si-katejon too ja na-aknan ni Ispirito Santo nen Apo Shiyos. Sajay ya Ispirito, si-katoy pilmiro nin ja in-akan nen Apo Shiyos son si-katejo, jet kitoka man-a-agag ngo ni tayoka pansessesked ja manbedin ali ni koston annak ma nen Apo Shiyos. Jet no onsabi sotan, saja bakdang tayo, ingesen toy itsora ni bakdang nen Cristo shi dangit.

<sup>24-25</sup> Ta aneng nin, eg simabi sota koston kaysedakan ni bakdang; nem wáray namnama tayo. Namnama bengat i wára, ta eg tayo pay laeng nin inon-an. Kenshat ta sotan i itsora ni kaysedakan tayo, enshiy eshom. Isonga enosan tayon seskeshen.

<sup>26</sup> Sota Ispirito Santo, emengi-kan ni anos son si-katejo. Asan sakey pay, kaontolong son si-katejo say makedsang kito ni olay. Ta si-katejo, eg tayo pay laeng amta ja pasiya no ngarantoy pesing nga manshewat son Apo Shiyos. Nem sota Ispirito Santo nen Apo Shiyos, si-kato met laeng i emengirewat nonta istay ishawat tayo koma, nem singa nged-as bengat iyay tep eg maybodikas shi esel ni si-katejon too.

<sup>27</sup> Jet si Apo Shiyos ja maka-amta ni nemnem ni too, toka ewati sota piyan ni Ispirito to, ta sota Ispirito to, si-katoy emanshewat para so nonta too nen Apo Shiyos, jet emaykompas ni olay nodta piyan nen Apo Shiyos sota shawat to.

<sup>28</sup> Amta tayo ey si Apo Shiyos, toka i-anap i panmaptengan nonta toon waray semek sha son si-kato. Sajay i toka pesing ni olay shi angken ngaranton mepesamak son si-kara, tep si-karay sigod ja ninemnem nen Apo Shiyos sa ma-osal shi piyan ton medeka shiya dobong.

<sup>29</sup> Ta amta ton sigod no sipa aliy memati son si-kato jet ninemnem to ey ingesen sha sota mismon Anak to ja si Cristo, ta piyan ton si Cristoy Pangodowan shen emin ja san-a-aki.

<sup>30</sup> Sotan iren toon pinidi to, si-karay ninemnem to ngo eshan ja mayda-kam son si-kato, jet si-kara met laeng sota too ton toka kosto-i niman. Jet si-kara, i-inges to ira so nen Cristo.

<sup>31</sup> Jet sajay den inkowan ko, enshi may eshom ma tayo ikowan, nem eg sajay bengat: no si Apo Shiyos ket si-katoy wara son si-katejo, angken sipay onkontra son si-katejo, eg tayo panshanagan.

<sup>32</sup> Eg to met inikotan sota Anak ton mismo, no diket intolok ton metey para son si-katejon emin. No sotan i inpasing to, sigorado ngarod ja i-akan ton emin i kasapolan tayo.

<sup>33</sup> Si Apo Shiyos, inbilang to ey enshi may basol nonta too ton pinidi to, isonga enshiy kowinta nonta ikowan ni angken sipa ey waray basol la ikaro nonta too to.

<sup>34</sup> Angken sipa, enshiy kanebengan shen mengigsheng ey meshosa kito tep imed ma petek ni kanawan nen Apo Shiyos si Cristo Jesus; isonga enshiy en ma-an-ano son si-katejo, tep shakitoka itakshel so nen Apo Shiyos. Nemnem jo ey saja si Cristo Jesus, si-katoy etey, nem nanbiyag mowan.

<sup>35</sup> Jet enshiy mengisi-jan son si-katejo shi semek nen Cristo, angken nganton digat i onsabi. Angken wáray mepesamak ja pansekitan na pasiya ni nemnem tayo, ono wára aliy memeditat son si-katejo, ono wára aliy bitil, ono enshiy ma-osal la baro; angken dilikaroy biyag tayo, ono angken metey kito, ebadeg ngo eshan i semek nen Cristo son si-katejo.

<sup>36</sup> Angken nonta bayag da, wára ngoy paras nonta too nen Apo Shiyos, ta say naysolat nonta bayag da, kowan to ey, “Inakew ja dilikaroy kasesaad mi ja singa patey i pantongpalan mi ta too jokami Apo Shiyos, jet say nemnem ni makakontra son si-kami, kowan sha ey singa kalniro kami, ja angken nganton oras palti-en shakami.” Kowan ni too nonta bayag da.

<sup>37</sup> Nem emin iyay ya digat ja emepespesamak niman, mengebak kito ngoreshan, tep si Cristo, ebadeg ni olay i semek to son si-katejo.

<sup>38-39</sup> Ta enshiy showashowak nonta semek nen Apo Shiyos. Sotan na semek to, wára ni olay son si-katejo, enshiy makabaal la onpotol so. Angken onsabi ali sota patey, ono wára kito pay laeng shi biyag, wára ngo eshan; angken nganton palsowa ja wára niman ono onsabi ali, angken anghil ono eshom ma eg ma-sas ja mapteng ono ngaaw,

aliwén sotan i memotol ni semek nen Apo Shiyos son si-katejo; wára ni olay. Saja semek to, mismon inpa-sas to son si-katejo ni indaw ali nen Cristo Jesus ja Apo tayo.

## 9

*Niman i kaysedakan ni aliwén Hodiyos, nem angken sota ira kait kon Hodiyos, maysedakan ngo ira di*

<sup>1-3</sup> Si-kak, emati-ak so nen Cristo, isonga agpayso iya ikowan ko di; aliwén na naka man-o-owap. Amtak ey aliwén o-owap iya ikowan ko tep sota Ispirito Santo nen Apo Shiyos i emengitoshong niya nemnem ko. Say kowan ko, sajay: ebadeg i naka pengisekit ni kait kon Hodiyos. Naka mandeshingit ta pasiya ni olay kabol son si-kara ja karada-an ko. No mebedin koma, angken si-kak et ngo i shosa-en nen Apo Shiyos ingkatod ingka, jet angken maysi-janak son Cristo, basta si-katoy pematian ni kait kon Hodiyos son Cristo. Nem eg met mebedin.

<sup>4</sup> Si-kara sota sigod ja too nen Apo Shiyos jet ebadeg i kaasi to son si-kara: si-karay inpanbalin ton annak to, naytakshol pay son si-kara sota emenenili ja emengipa-sas ni kawasha to son si-kara; nay-awat pay son si-kara sota bilin to; inkari to pay son si-kara ey si-karay ibilang ton too to, tan wára pay i eshom ma inkari to son si-kara; tan naypiyal pay son si-kara sota koston pesing shen manshedjaw son si-kato.

<sup>5</sup> Si-karay poli nonta mismon sampolo tan showen annak nen Israel, jet si Cristo ja inbetkag

ali nen Apo Shiyos, no maypangkep ni kinatoo to, edapo met laeng shi poli nen Israel; isonga kait sha met laeng si Cristo. Jet si Cristo, ja Shiyos met laeng, si-katoy Kangeto-an so ni emin, tan si-kato pay i mayshedjaw ingkatod ingka! Siya, satan da.

<sup>6</sup> Aliwén kowan ko ey engawngaw sota kari da nen Apo Shiyos son si-kara nonta bayag da, ja ootik son si-karay maysedakan. Ta say kowan ko, aliwén emin na edapod poli nen Israel ket agpayson too nen Apo Shiyos.

<sup>7</sup> Aliwa ngon emin na medepod poli nen Abraham ket maykeshi ey podnon poli to ja mekitewid nonta inkari nen Apo Shiyos son Abraham, tan si Isaac ja anak to. Enshi, ta say kowan nen Apo Shiyos son Abraham nontan da, kowan to ey, “Sota ipoli ali nen Isaac, si-karay maykeshi ey koston polim, aliwén sota ipoli ni eshom ma anak mo.” Kowan to,

<sup>8</sup> jet say olog niyay, aliwén na sota naypoli-an ni too i kabol la kaybidangan sha ey annak ira nen Apo Shiyos, no diket sota toon etongpalan nonta kari nen Apo Shiyos, si-karay maybidang ey podnon annak to.

<sup>9</sup> Ta si Isaac met i etongpalan nonta kari to nonta bayag da; isonga wára sota kari to son Abraham ja kowan to ey, “No onsabi ali sota koston timpo, ondawak ali et on-anak si Sara ja asewam ni daki.”

<sup>10</sup> Jet aliwén sotan bengat. Si Rebecca ja asewa nen Isaac, nonta kalokon to so nonta anak ton epin, ja inpotot nen Isaac ja makapoli son si-katejo,

11-12 inkowan nen Apo Shiyos so nen Rebecca nontan ey sota pinidi to, kenshat ta sotan; kowan to ey, “Sota na-onod ja nay-anak et ngo mowan i pati-en nonta epangdo.” Sajay ya inpasing nen Apo Shiyos nonta eg pay laeng nay-anak sota anak nen Rebecca ja epin, pinidi to sota sakey, ey enshi nin nontan i aramid shen mapteng ono ngaaw, ta wára nin pay laeng ired dokon. Jet sajay i edaga, say sota nemnem nen Apo Shiyos, ni toka pemidi ni too to, ontoloy; jet say sigod ja toka pesing ja memidi ja ibilang to ey too to ma, sota piyan to, aliwén sobadit ni aramid ni too.

13 Si-katoy kowan met laeng nonta naysolat nonta bayag da, ja esel nen Apo Shiyos ey, “Si Jacob i ensemek ko, nem ekak ensemek si Isaw.”

14 Eg jo koma ikowan ey ngaaw i kepesing nen Apo Shiyos, ja waray pinaboran to. Ayshi, arawí itan na nemnem.

15 Mapteng sotan na toka pesing; isonga inkowan to so nen Moises nonta bayag da ey, “Sota piyan kon sesmeken, si-kato, jet sota piyan kon kaasi-an, si-katoy kaasi-an ko.”

16 Isonga sota kaasi nen Apo Shiyos, aliwén may-ekan nodta makapiyan so, ono nodta toon kowan to ey idigatan to say si-katoy mepaboran, no diket olay tos Apo Shiyos no sipay kaasi-an to.

17 Say kay-eshigan niyay, si Paro ja ari nonta bayag da. Isonga waray naysolat ja esel nen Apo Shiyos son Paro, ja kowan to ey, “Inpanbalin taka ni ari say si-kam met laeng i mismon ka-asan to ey si-kak i Kangeto-an, ta i-onod moy piyan ko ni anongosto, say sota ngaran ko ma, maypedawag shi intiron dobong.” Kowan nen Apo Shiyos son



Paro.

<sup>18</sup> Isonga sajay i nemnemen jo, ta sota piyan nen Apo Shiyos ja kaasi-an, si-kato; jet sota toon piyan nen Apo Shiyos ja angken ontangken i nemnem ton eg memati, si-katoy medeka.

<sup>19</sup> Jet sigosho say kowan jo mowan, “Apay ngarod nga kowan nen Apo Shiyos ey wáray basol ni too, no sotan i wára son si-kato, ey enshi met i kabedinan ni toon memediw ni dag-en to, ta si Apo Shiyos met i sigod ja nannemnem so!”

<sup>20</sup> Nem too ka bengat jet eg ka koma onpa-so ja onsopngil son Apo Shiyos! Say kay-eshigan to, sota mandeka ni banga. Enshiy mebedin nonta banga ja onsopngil nonta itsora ni inkaleka to. Sota inpasing nonta dimaga so, si-kato.

<sup>21</sup> Sota emandeka ni banga, wára ngo son si-kato no ngantoy pesing ton memkel nontan na banga. No piyan nonta mandeka ey sota sakey ket, dag-en ton memapteng ja kay-iyanan ni sabsabong, si-katoy pesing to, ono sota sakey ket dag-en ton para pengi-janan ni ensekig, si-kato ngoy pesing to. Ta wáray kanebengan ton mandeka ni piyan to.

<sup>22</sup> Isonga wáray kanebengan nen Apo Shiyos ja mengipekat ni panakabalin ton menosa niya dobong say ma-ama-an ey si-katoy Manakabalin na Shiyos. Nem inenosan to nin ja eg to pay laeng shosa-en sota toon anam ton ma-aknan ni embel-at ta shosa,

<sup>23</sup> say sota eshom ma too, ja insagana ton sigod ja mayda-kam son si-kato met laeng shi dangit, ama-an sha ey ebadeg i kaasi to.

<sup>24</sup> Jet si-katejo sotan na pinidi nen Apo Shiyos ja too to; aliwén emili bengat son si-kamin Hodiyos, no diket angken son si-kayon aliwén Hodiyos.

<sup>25</sup> Saja inkayda-kam jon aliwén Hodiyos, si-katoy kaytoshongan nonta inkowan nen Apo Shiyos ja insolat nen Osias nonta bayag da, ja kowan to ey,

“Sota ira istay aliwén took, ibilang ko ma ey took ira. Jet sesmeken ko ira sota istay ekak kinosto-an nontan da.

<sup>26</sup> Istay ya nayngadnan iren too ja in-oway ko, nem ibilang ko iren mismon annak ko.”  
Kowan nen Apo Shiyos.

<sup>27</sup> Jet si Isaias nonta bayag da, wára ngoy inkowan to, nem maypangkep so nonta ira Hodiyos, ja kowan to ey,

“Sota ira poli nen Israel, angken eshakil iren pasiya ja singa karakel nonta bisil shima kilig ni baybay, ootik son si-kara i maysedakan.

<sup>28</sup> Ta si Apo Shiyos, eg to ishokey i timpon pengenos to son si-kara, no diket dag-en ton shagos sota kowan to ey dag-en to.”

<sup>29</sup> Jet si Isaias, wára ngo nonta bayag da i inpadto to, ja kowan to ey,

“No enshiy kaasi nen Apo Shiyos, istay emin kiton poli nen Israel, mekolpi kiton enshiy mebaybay-an; istay mesheshal kiton emin, ja ingesen tayo sota tood ma siyodad ni Sodoma tan Gomora ja ekolpi.”

<sup>30</sup> Jet iyay i esa-nopan nonta emin na inkowan ko la. Sota ira aliwén Hodiyos, istay eg sha ninemnem i kosto-an so nen Apo Shiyos son

si-kara, nem kinosto-an ira nen Apo Shiyos tep emati ira son Cristo.

<sup>31</sup> Nem sota ira Hodiyos et ngo mowan, say kowan sha ket, kosto-an kono ira nen Apo Shiyos ja sobadit ni itongpal sha so nonta bilin to ja naysolat nonta bayag da, nem enshi, ta eg sha kabaalan na onoren na emin.

<sup>32</sup> Jet ngantoy kabol la nankolongan sha? Say kabol la nankolongan sha, nanshinel ira nonta kowan sha ey tongpalen shay bilin nen Apo Shiyos, ey eg sha kari baalan. Say inpasing sha koma, emati ira son Cristo say kinosto-an ira nen Apo Shiyos. Isonga singa nayko-bilan ira, jet sotan i kaytoshongan nonta esel nen Apo Shiyos nonta bayag da,

<sup>33</sup> ja naysolat, ja kowan to ey, “Waray ibetkag ko la so ni took jet sajay da, may-eshig shi bato ja inseked ko nodta shalan ira nonta totoo. Jet eshakil i mayko-bilan nodtan. Nem sota ira memati son si-kato, eg ira medismaya tep waray panpa-no-an ni pansaad to.”

## 10

<sup>1</sup> Si-kayon a-akik shi pamati, say wared nem-nem ko ni olay, sota maypangkep ni kait kon Hodiyos. Naka ishawshawat so nen Apo Shiyos ey maysedakan ngo ira.

<sup>2</sup> Waray mapteng mango son si-kara, ta say wared nemnem sha, kowan sha ey mansilbi ira son Apo Shiyos. Nem aliwen kostoy shaka pansilbi, ta bimaki ira.

<sup>3</sup> Ta eg sha amtay koston pesing sha say kosto-an ira nen Apo Shiyos. Say wared nemnem

sha, kowan sha ey sota pandekara ni mapteng, si-katoy kosto-an so ira nen Apo Shiyos, jet si-katoy shaka pespesing; eg sha i-onod nodta kowan nen Apo Shiyos ey dag-en sha koma.

<sup>4</sup> Sota bilin nen Apo Shiyos nonta bayag da, eg ma mansilbi niman ta binediwan to ni indaw ali nen Cristo; isonga si Cristoy singa engintegangan ni sakop nonta sigod ja bilin. Jet niman, emin na memati son si-kato, kosto-an nen Apo Shiyos.

<sup>5</sup> Isonga waray insolat nen Moises nonta bayag da maypangkep nonta toon kowan to ey mengonod nonta bilin nen Apo Shiyos say kosto-an to; kowan nen Moises ey, “Ampet tongpalen mon emin sota bilin nen Apo Shiyos, asan ka may-akni ni biyag.” Kowan nen Moises.

<sup>6</sup> Nem aliwen sajay i kosto-an so nen Apo Shiyos so ni too niman, no diket sota pamati to son Cristo. Isonga wara pay i inkowan nonta naysolat ey,

“Aliwen mo nemnemen ja ondaw shi dangit (eg mesepol tep dimespag alis Cristo);

<sup>7</sup> aliwen mo nemnemen ja ondaw shima nayshalem ja kawad-an ni etey (eg mesepol tep nan-ongal alis Cristo).

<sup>8</sup> Sota esel nen Apo Shiyos, waren nay-esop son si-kam, waren mismo shita nemnem mo, tan shita bongot mo.”

Kowan to, jet sotan na mismon esel to, si-katoy mika pan-itoro so ni angken sipa.

<sup>9</sup> Jet sajay sotan na esel: no ikowan mon mismo, ja eg mo ibaing, ey si Jesus bengat i Apom, tan pati-en mo ey si Apo Shiyos ket inpan-ongal to si Jesus, maysedakan ka.

<sup>10</sup> Ta no mismon si Cristoy wáred nemnem mo ja pinatim, kosto-an toka nen Apo Shiyos; jet no mismon pa-amtam ngo shi eshom i inpamatim, maysedakan ka.

<sup>11</sup> Jet say kowan nonta naysolat nonta bayag da, kowan to ey, “Sota ira memati son Apo Shiyos, sigoradon metongpal ali sota namnama shen mekaasi-an.” Kowan nonta naysolat.

<sup>12</sup> Jet sajay, enshiy nandasinan ni angken sipen too — Hodiyou ono aliwén Hodiyou. Ta say Apo shen emin, saksakey ja si Cristo, jet si-katoy emengaasi so ni emin na manbeka son si-kato, jet sobda pay i toka i-akan son si-kara.

<sup>13</sup> Ta say kowan met laeng nonta naysolat nonta bayag da, kowan to ey, “Angken sipen too ja manbeka ni kaasi son Apo Shiyos, kaasi-an ton isalakan.”

<sup>14</sup> Nem eg amta ni too no sipay koston panbeka-an sha ni kaasi no eg ira nin emati. Jet enshiy pesing shen memati, no eg sha nin itenengan i toro pangkep son Cristo. Jet enshi ngoy pesing shen mengitneng, no enshiy en mengitosho.

<sup>15</sup> Jet enshi pay i toon en mengitosho, no eg ibetkag nen Apo Shiyos. Nem wára met i inbetkag ton en mengitosho. Si-katoy kaytoshongan nonta naysolat nonta bayag da, ja kowan to ey, “No itenengan tayo diy shanapshap ni katin ira nonta mengitosho ni mapteng nga shamag, kitoka man-imdeng.” Isonga wáray mebedin na memati.

<sup>16</sup> Nem aliwén emin na mengitneng so ket, memati ira. Ta sotan met laeng i inpadto

nen Isaias nonta bayag da, ja kowan to ey, “Apo, manmanoy ememati nonta intoro mi son si-kara.”

<sup>17</sup> Jet niman ma, sota mengitneng ni toro maypangkep son Cristo, si-kara bengat i mebedin na memati, jet say itenengan sha so, sota ondaw wa en mengitosho son si-kara.

<sup>18</sup> Jet say kowan ko, sigod ja intenengan sha met; isonga enshiy pangbal sha ni eg sha pemati-an so. Ta say kowan nonta naysolat nonta bayag da, kowan to ey, “Angken towen dogad, waray engitneng ni inkowan sha, jet naywaris sotan shi intiron dobong.”

<sup>19</sup> Jet kowan ko pay ey sota ira kait kon Hodiyo, mebedin na inewatan sha sota sigod ja banshaan son si-kara ey sota ira aliwen Hodiyo et ngo mowan i kaasi-an nen Apo Shiyos. Ta angken nonta timpo nen Moises nonta bayag da, kowan nen Apo Shiyos ey, “Sota ira toon aliwen took, waray dag-en ko son si-kara, say si-kayon sigod ja took, ma-epal kayo son si-kara. Angken enshiy pamatira, kaasi-an ko say onbonget kayo.”

<sup>20</sup> Jet si Isaias nonta bayag da, intoled ton inkowan sota inkowan nen Apo Shiyos ey, “Sota toon aliwen si-kak i pangkep shen amta-en, inamta-an sha-ak et ngo mowan, jet sota ira eg manbeka pangkep son si-kak, si-kara et ngo mowan i inpa-amta-an ko so met laeng maypangkep son si-kak.” Kowan nen Apo Shiyos maypangkep nonta ira aliwen Hodiyo.

<sup>21</sup> Nem no maypangkep nonta ira Hodiyo, kowan nen Apo Shiyos nonta bayag da ey, “Naka

ipa-sas ni olay ey piyan kon on-oli iray took son si-kak, nem eg sha kosto, shaka et ipilit i piyan sha.”

## 11

<sup>1</sup> Sigosho kowan jo ey si Apo Shiyos, singa inbiyang to iray Hodiyoos ja too to. Nem enshi, arawi sotan! Kinapodno to, angken si-kak, Hodiyoosak, ta poli towak nen Benjamin ja mismon anak nen Israel da; isonga poli towak ngo met laeng nen Abraham.

<sup>2</sup> Si Apo Shiyos, eg to inbiyang sota too ton sigod ja pinidi to, nem ootik nin i imonong ja emati, jet arig to ngo sota timpo nen Elias. Ta si Elias nonta bayag da, inkowan to son Apo Shiyos sota aramid ira nonta tood Israel,

<sup>3</sup> ja kowan to ey, “Apo, binonora ira sota para padton inbetkag mo, jet binagbag sha pay sota ira panshedjawan ni totoo son si-kam. Si-kak bengat i ebay-an ja emansilbi son si-kam, jet piyan sha pay ja bono-en sha-ak.”

<sup>4</sup> Nem say songbat nen Apo Shiyos son si-kato, kowan to ey, “Waray piton dibon too ja ekak intolok ja manshedjaw so nen Baal ja sinan shiyos.” Sajay i kowan nen Apo Shiyos.

<sup>5</sup> Jet angken niman, inges to met laeng nontan. Wara iray Hodiyoos sa pinidi nen Apo Shiyos ja kinaasi-an to, nem aliwen eshakil.

<sup>6</sup> Nem sota toon pinidi nen Apo Shiyos, dibshiy inkaasi to, aliwen sobadit nonta mapteng nga dingkara. Ta no say pemidi nen Apo Shiyos so ni too to ket, sota sobadit nonta mapteng ja dingkara, aliwa malen kaasi sotan.

<sup>7</sup> Sota naksheng den inkowan ko la, sajay i esa-nopan to. Sota ira Hodiyo, eg sha kinon-od sota kinosto-an so nen Apo Shiyos son si-kara, angken sotan i istay shaka kamkamkami. Waray eshom son si-kara ja pinidi nen Apo Shiyos, jet si-karay kinosto-an to; nem sota ira eshom, timangken i nemnem sha, eg sha kosto sota kowan nen Apo Shiyos.

<sup>8</sup> Sajay i kaytoshongan nonta kowan ni naysolat nonta bayag da, ja kowan to ey, “Si Apo Shiyos met laeng i inpatangken so ni nemnem sha, jet angken niman, singa eg ira man-esas, tan singa eg ira makateneng.”

<sup>9</sup> Jet angken si Ari David nonta bayag da, kowan to ey,

“Sota eshakil la inkaasi nen Apo Shiyos son si-kara, sotan et ngo mowan i kabol la keshosa-an sha tep binedaw sha. Siya, singa mekna ira, singa mesol-an ira, tep anam shen meshosa!

<sup>10</sup> Angken mekimit ja eg man-esas sota matesha! Jet mayda-karan ira ni digat ni olay ingkatod ingka!”

<sup>11</sup> Jet idi singa nayko-bilan sota karakdan na Hodiyo ni eg sha pemat i son Cristo, kowan jo emo nem sotan ni olay? Eg ira makabangon? Kinapodno to, mebedin na on-oli ira mowan son Apo Shiyos. Nem kabol nontan na eg sha pemat i son Cristo, mebedin men maysedakan ngo iray aliwen Hodiyo. Jet balang nem ma-epal ira sota Hodiyo ja mannemnem ngo ira.

<sup>12</sup> Ta say kowan ko, singa sota basol ni Hodiyo ni eg sha pemat-an son Cristo i kabol ja pan-



maptengan ni emin na tood ja dobong, tan sota kakodang ni pamatira i kabol la kinaasi-an nen Apo Shiyos ira sota aliwen Hodiyo. Nem mas ebadbadeg i kaasi ali nen Apo Shiyos, no onsabi sota timpon kay-odi ni Hodiyo shi koston pamati!

<sup>13</sup> Niman ma, iyay i piyan kon ikowan son si-kayon aliwen Hodiyo, agdalo ta si-kak i apostol ja inbetkag nen Apo Shiyos para son si-kayo. Jet saja naka penosho son si-kayo, naka ipakat i kabaalan kon pasiya, say eshakil aliy memati.

<sup>14</sup> Nem say pangkep ko pay, piyan kon asen ira nonta kait kon Hodiyo, say maynemneman ira, jet balang nem maysedakan ngo ira sota eshom.

<sup>15</sup> No bilang ey maysedakan i Hodiyo, asdeg toy kaasi nen Apo Shiyos son si-katejon emin! Ta say nanpa-no-an ni engibiyangan nin nen Apo Shiyos so ni Hodiyo, nan-esop i eshakil la tootood dobong tan si Apo Shiyos. Jet ngaranto emoy panpa-no-an ni pan-odira son Apo Shiyos? Enshiy eshom nem eg sota panbiyag mowan ni nanketey!

<sup>16</sup> Sigod ja too ira nen Apo Shiyos tep pinidi tos Abraham nonta bayag da jet ontaron ja too to met laeng sota ira poli to. Arig to sota kepesing ni Hodiyo nonta tinapay. Shaka idaton son Apo Shiyos sota pilmiron edoto jet da-kaman ton singa naydaton ja emin sota eshom alin tinapay ja medoto pay. Tan say arig to pay, sota kadasan. No pinidi nonta makakokowa sota damot, mayda-kam ngon singa epili sota panga nonta kadasan na makadamot nonta epili.

17 Saja kadasan, i-arig ko maypangkep ni kasesaad jon aliwén Hodiyos. Sota naymola ja kadasan, si-katoy may-eshig so ni Hodiyos, jet si-kayon aliwén Hodiyos, may-eshig kayo ey kadasan bengat, ja aliwén koston mola. Jet say edaga niman na timpo, sota eshom ma panga nonta sigod ja naymola, epotol. Jet naysilpo kayo nodta sigod ja mola, jet nayda-kam kayo ma nodta biyag nonta mola.

18 Nem si-kayo, karekayo on-itek ja damsisen jo sota sigod ja panga, ta aliwén si-kayoy engi-det nonta kadasan, no diket sota damot, si-katoy emengi-kan ni kedsang jo.

19 Karejo ikowan ey, “Siya, sota sigod ja panga, epotol say si-kak i maysa-dat ja maysilpo.”

20 Agpayso ja sajay i epasemak son si-kara, nem say kabol, eg ira memati, jet say kabol ngon naysa-datan jo son si-kara ja naysilpo nodta kadasan, emati kayo son Cristo. Isonga aliwén kayo on-itek ni maypangkep niyay ya edaga son si-kayo, no diket man-anad kayo koma.

21 Ta say nemnemen jo, sota koston panga, pinotol nen Apo Shiyos nodta kad-an sha, ey si-karay sigod. Nem si-kayo, aliwén koston panga kayo, isonga mas nam-ay ya ma-kal kayo, no onbaki kayo.

22 Mesepol la amta-an jo ey si Apo Shiyos, man-angaasi, nem eg to ngo baybay-an ja shosa-en sota mandeka ni ngaaw. Epaladoy inpasing to so nonta ira Hodiyos ni inpankolang sha, nem si-kayo, itoloy ton kaasi-an tokejo pay laeng no itoloy jon sota kaasi toy nemnemen jo. Nem no eg jo itoloy, mebedin ngon isi-jan tokejo ja

potolen nodta naysilpo-an jo.

<sup>23</sup> Jet sota ira Hodiyo ja naysi-ja, no may-odi iren memati, may-odin maysilpo met laeng ira mowan nodta sigod, ta si Apo Shiyos, waray panakabalin ton mengi-odi met laeng son si-kara.

<sup>24</sup> Jet mebedin na may-odi ira, ta no sota may-eshig ey panga ni kadasan ja aliwen mola ket naysilpo nodta bakdang ni mola ja kadasan, mas namnam-ay sota sigod ja panga ja may-odi mowan nodta edapo-an sha. Mas nam-ay ta nodtan i sigod ja edapo-an sha, nem si-kayo, singa eg kayo may-enam.

<sup>25</sup> Si-kayon a-akik shi pamati ja aliwen Hodiyo, piyan kon amta-an jo iya badon toro ja edapo so nen Apo Shiyos. Nemnem jo nin na pasiya say eg jo iba-ba-ngat i kokowan ey waray nandasinan jo shi Hodiyo. Sota eg pematni ni eshom ma Hodiyo, aliwen sotan ni olay, no diket ingkato bengat nodta kakosto ni bilang ira nonta aliwen Hodiyo ja memati ali.

<sup>26</sup> Jet no metongpal ma ira jay, sota ira karakdan na Hodiyo, maysedakan ma ira. Sajay i kaytoshongan nonta esel nen Apo Shiyos nonta bayag da ja kowan to ey,

“Sota Mengisedakan, medepo met laeng alid ili ni Hodiyo, jet say pesing ton mengisedakan ira nonta poli nen Jacob, a-kalen toy ngaaw wa aramid sha jet sota mapteng may maysa-dat.

<sup>27</sup> Jet say ikarik son si-karen took ja tood Israel, omasen koy basol sha.” Kowan nen Apo Shiyos.

<sup>28</sup> Saja ira Hodiyo, eg ira memati nonta

mapteng nga shamag maypangkep son Jesus, isonga kontra ira nen Apo Shiyos niman. Jet kabol niyay, naysa-dat kayon aliwén Hodiyo son Apo Shiyos. Nem ensemek to pay laeng ira sota Hodiyo, tep totoo toy makapoli son si-kara, jet eg bediwan nen Apo Shiyos i inpili to son si-kara.

<sup>29</sup> Tep no ngarantoy inkari nen Apo Shiyos, si-katoy medeka, eg mesa-datan; jet sota Hodiyo ngo eshan i pinidi to ja engi-watan to ni kari to.

<sup>30</sup> Nontan da, eg kayo emati son Apo Shiyos jet sota ngo ira Hodiyo, too to ira. Nem niman, kinaasi-an shakejo et ngo mowan nen Apo Shiyos, tep sota ira Hodiyo, ja sigod ja too to, eg sha tongpalen niman i piyan nen Apo Shiyos.

<sup>31</sup> Sota ira Hodiyo, eg sha pinati si Apo Shiyos, isonga kinaasi-an shakejo nen Apo Shiyos ni inpamatiyo. Jet inges to ngon kaasi-an to sota ira Hodiyo no man-odi ira mowan ja mematin kosto son Cristo.

<sup>32</sup> Isonga emin na too, angken ngantoy katoo to, intolok nen Apo Shiyos ja angken eg ira nin memati, say man-i-inges ja kaasiy pesing to son si-karen emin.

<sup>33</sup> Angken nganto, amta nen Apo Shiyos; isonga sota wared nemnem to, si-katoy kosto. Jet angken sipa, enshiy maka-awat nonta emin na pangkep to, ono sota toka dagdag-a.

<sup>34</sup> Si-katoy kaytoshongan nonta naysolat nonta bayag da ja kowan to ey,

“Enshiy maka-amta ni wared nemnem nen Apo Shiyos, jet enshi pay i mebedin na mengi-tosho son si-kato ni pesing to.

<sup>35</sup> Jet angken sipa, enshiy to inpa-otang son Apo Shiyos, ja to ikowan ey bayshan nen Apo Shiyos son si-kato.”

<sup>36</sup> Ta emin na banag, si Apo Shiyos i pimalsowa so, jet si-kato pay i emengajowan so, tan si-kato met laeng i panshedjawan sha. Siya, si Apo Shiyos i mayshedjaw ni olay ingkatod ingka. Siya, satan da.

## 12

### *Sota epateg ga ogadi ni toon emati son Cristo*

<sup>1</sup> Jet niman si-kayon a-akik shi pamati, ki-naasi-an shakejo nen Apo Shiyos; isonga iyay i kekshawen ko son si-kayo. Niman na wára kayod biyag pay laeng, i-kan jon mismo i biyag jo son Apo Shiyos ja singa daton jo son si-kato, jet si Apo Shiyos ni olay i nemnemnemen jo. Sajay i dag-en jo ni olay, ta sajay i mengi-kan ni pan-imdengan to. Sajay i koskoston pesing nga manshedjaw son si-kato, ta eg mayba-ba-ngat.

<sup>2</sup> Karejo on-onoran i ngaaw wa aramid ni karakdan na tood ja dobong, no diket ipedobos jo koma ja si Apo Shiyos i onbaliw so ni nemnem jo say mannemnem kayo ma ni kosto. No sajay i pesing jo, amta-en jo sota aramid ja toka kosto-i. Jet sota piyan nen Apo Shiyos ja medeka, sotan i mapteng, sotan i enshiy kolang to, sotan i mengi-kan ni pan-imdengan to.

<sup>3</sup> Ebadeg i kaasi nen Apo Shiyos son si-kak, ni inpanbalin towak so ni apostol; isonga ibilin ko iyay son si-kayo. Si-kayon emin, nemnem jo koma no ngantoy koston in-akan nen Apo

Shiyos ja kabaalan jon itolong shi eshom; nem eg jo koma da-bagan i kinapateg jo kabol nonta kabaalan jon in-akan nen Apo Shiyos.

<sup>4</sup> Jet say kay-eshigan tayon emati, saja bakdang tayo. Say bakdang, sakey bengat, nem eshakil i parti to, jet eg man-i-inges i obda nonta parti ni bakdang.

<sup>5</sup> Isonga angken eshakil kito, naykasakey kito son Cristo pangkep ni pamati tayo son si-kato, jet sankagait kito ma.

<sup>6</sup> Isonga say in-akan nen Apo Shiyos so ni sakey tan sakey son si-katejo ja itolong shi eshom ma emati, ekalkalasi; jet mesepol la osalen tayon emin. No say in-akan nen Apo Shiyos ket sota baal mon mengipa-amta nonta inpa-amta nen Apo Shiyos son si-kam, sotan i dag-en mo, ja may-enam nodta pamati tayo.

<sup>7</sup> Jet no say amtam, ja in-akan nen Apo Shiyos son si-kam ket sota ontolong ni makasapol, si-katoy dag-en mo. No sota pengitosho i wára son si-kam, pangitoto ka.

<sup>8</sup> No say wára son si-kam ket sota mengi-kan ni kedsangan ni pamati ni eshom, si-katoy dag-en mo. Sota waray kabaalan ton mengila-kam ni eshom, man-imdeng komen mengila-kam ni eshom. Jet sota pangolo ni emati, alisto komen mengitoshong ni too to, ja eg to baybay-an i toka pan-itod-i. Jet sota amta ton mengaasi, mansi-met koma ja mengaasi ni eshom.

<sup>9</sup> Jet sota semek jo ni kait jo, mesepol la sota podnon semek. Sota ngaaw, arawí-i jo, jet sota mapteng, si-katoy nemnemnemen jo.

<sup>10</sup> Semek joy kait jon emati ja inges toy semek jo so ni mismon agi jo, jet wára komay pengired-jaw jon pasiya so ni sakey tan sakey.

<sup>11</sup> Kanas jon emin i joka dagdag-a pangkep ni joka pansilbi son Apo Shiyos; eg kayo koma onsarot.

<sup>12</sup> Pan-imdeng kayo tep waray namnama jo ali son Cristo. Isonga no waray memedigat son si-kayo, anosiyo. Jet pansawat kayo ni olay son Apo Shiyos.

<sup>13</sup> Mesepol la ontolong kayo nodta kait jon waray mesepol to. Tan sintil jon kosto sota eshom ja onmotok shi baley jo.

<sup>14</sup> Sota ira memedigat son si-kayo ali, karejo i-abigan, no diket ikowan jo et son si-kara ey, "Sapay koma ta bindisiyonan shakejo nen Apo Shiyos."

<sup>15</sup> Paki-imdeng kayo so nonta ira man-imdeng, jet pakidaringit kayo ngo so nonta ira eman-deshingit.

<sup>16</sup> Pan-i-inges jon mapteng i pesing jo so ni sakey tan sakey son si-kayo. Aliwen kayo ondas-tog, no diket pakikadwa kayo so nonta ira ebaba. Aliwen jo ipangkep ey si-kayoy kalaingan.

<sup>17</sup> No waray ngaaw wa dingka ni eshom son si-kayo, aliwen jo ibales. Say nemnemnemen jo koma ja dag-en, sota mapteng ja kekosto-i ni karakdan.

<sup>18</sup> No mebedin, dagejoy kabaalan jon mekikadwa so ni emin na totoo, say enshiy bakal.

<sup>19</sup> A-akik shi pamati, aliwen jo ibales no ngantoy ngaaw wa dag-en ni eshom son si-kayo.

Bay-iyo, ta si Apo Shiyos i maka-amta ja onshosa son si-kara. Tep wáray naysolat ja esel nen Apo Shiyos nonta bayag da ja kowan to ey, “Si-kak i maka-amten mengibedes ja onshosa nonta ngaaw i aramid sha.” Kowan nen Apo Shiyos.

<sup>20</sup> Jet say pesing jo, patiyó sota bilin nen Apo Shiyos ja naysolat nonta bayag da, ja kowan to ey, “No sota makakontra son si-kam ket na-agang, pakan mo. No na-kew ni shanom, i-aknim ni inomen to. Ta no sajay i dag-en mo, mebebaingan et ondeshang.” Kowan to.

<sup>21</sup> Aliwén jo ibales, ja mandeka ngo ni ngaaw, ta no sajay i pesing jo, singa si-kayoy inebak ni ngaaw. Isonga sota mapteng ni olay i ipa-sas jo son si-kara say maynemneman ira.

## 13

<sup>1</sup> Angken sipa, mesepol la pati-en sha sota toray ni gobirno. Ta enshiy nganton toray ja mansaad no eg inpalobos nen Apo Shiyos. Emin na toray, si Apo Shiyos i engisaad so.

<sup>2</sup> Isonga sota eg memati ni toray, singa si Apo Shiyos i kontra sha, ta si-katoy engisaad nontan na toray. Jet sota toon sajay i pesing to, ikaro to son Apo Shiyos.

<sup>3</sup> Say nebeng nga ontakot so nonta ira toray, sota ira wáray aramid shen ngaaw, nem no say aramid jo ket mapteng, enshiy jo itakot ja dag-en ni toray son si-kayo, no diket may-a-tek kayo et pay.

<sup>4</sup> Ta sota toray, si-katoy insaad nen Apo Shiyos ja mengesas ni panmaptengan jo. Nem no say



aramid jo ket ngaaw, si-katoy tekotan jo, ta say toray, wáray nebeng ton menosa son si-kayo, jet kenshat ta sotan i dag-en to. Ta si-katoy insaad nen Apo Shiyos ja menosa ira nonta wáray basol to.

<sup>5</sup> Mesepol la pati-en jo sota ira toray; nem aliwén sota maypangkep ni penosa nen Apo Shiyos i pati-an jo so bengat; i-onod jon pati-en ira tep si-katoy amtayon koston nebeng nga medeka.

<sup>6</sup> Jet kabol met laeng niyay, mesepol pay ya manbedjad kayo ni bowis jo, ta sota ira toray, si-karay insaad nen Apo Shiyos ja emengolnos ni ili, isonga mesepol shay pilak.

<sup>7</sup> Sota anam ni toray ja ipaay jo, si-katoy dag-en jo. No ngarantoy pansingila nonta para singil ni bowis, si-katoy i-akan jo. Jet sota anam ton mayshedjaw, si-katoy ishayaw jo.

<sup>8</sup> No wáray otang jo, mesepol la bayshan jo say meksheng; nem no sota maypangkep ni semek jo so ni sakey tan sakey, mesepol mangon wára sotan ni olay. Jet no wáray semek jo so ni kait jo, singa tinongpal jon emin sota kowan nonta bilin nen Apo Shiyos ja naysolat nonta bayag da.

<sup>9</sup> Eshakel iray bilin to jet sajay iray eshom: “Kareka memii, kareka memono, kareka mengibot, karam kamkaman i kokowa ni eshom.” Nem angken nganton bilin nen Apo Shiyos, sakey bengat i esa-nopan ton esel; si-kato iyay: “Semek moy kait mon too ja inges toy moka penmek ni bakdang mo.”

<sup>10</sup> No ensemek moy kait mo, aliwén mo doko-en, no diket mapteng ni olay i pesing mo

son si-kato. Isonga sotan na semek, si-katoy timongpal nonta emin na bilin nen Apo Shiyos.

<sup>11</sup> Sajay i medeka, ta si-katoy kasapolan niman na timpo. Mesepol la manmodiyat kayo, si-kayon emanpampamaayan ja singa na-ogip. Ta shanshani ma sota timpon pengeda nen Cristo son si-katejo; manshoki nonta inpamati tayo son si-kato, eman-a-sop ma sotan na timpo.

<sup>12</sup> Sota may-eshig ey dabi, ja timpo tayod ja dobong, shanshani men mepospos, jet isa-dat nen Apo Shiyos sota inkari ton mapteng nga timpo, ja may-eshig ey ka-akawan. Jet sota pandeka ni ngaaw wa aramid, ja emedegdeka niman na timpon embolinget, mesepol la sa-datan tayo ni pandeka ni mapteng nga aramid, say may-enam kiton manbiyag no timpo alin ka-akawan. Sota pandeka ni mapteng i osalen tayo niman say eg kito ma-ebak.

<sup>13</sup> Olnosen tayo shorog i bakdang tayo, ta si-katoy koston ogadi ja may-enam nodtan alin maysa-dat ta timpo. Isonga aliwén tayo ma dag-en sota panboteng, ono edaos sa pandadsak, ono sota eshom ma na-alas sa aramid, jet ibi-jag tayo pay sota pekibekal tan pengepal ni eshom.

<sup>14</sup> Nem say nemnemen jo et ja dag-en, sota inges ni dingka nen Apo Jesucristo; isonga niman, karejo ma nemnemen ja dag-en sota pipiyan jon dag-en nonta eg kayo pay laeng emati.

## 14

<sup>1</sup> No wára son si-kayo i toon ekapoy i pamati to ta eg etod-an ni kosto, awat jo sotan na

too. Karekayo mekisongbat son si-kato, no diket ipeteg jo sota wáred nemnem to.

<sup>2</sup> Say sakey ya nan-i-inapilan ni nemnem ni too, sajay. Kowan ni eshom ey palobos i pangan ni angken nganto. Nem wára ngoy eshom, ja eg etod-an ni kosto, ja say wáred nemnem sha, sota natnateng bengat i mebedin na kenen sha.

<sup>3</sup> Nem sota toon mebedin na kenen toy angken nganto, aliwén to koma bedawen sota nagshengan i toka kena. Jet kasta met sota sakey, eg to koma bedawen sota emengan ni angken nganto. Tep inges to ngon inewát nen Apo Shiyos met laeng sotan na too.

<sup>4</sup> No eg nay-inges i nemnem ni eshom son si-kam, eg mo koma bedawen, tep aliwén si-kam i apo to, no diket si Cristo. Eg mo koma ikowan ey kosto ono aliwén kostoy nemnem ni sakey ya бага-en ja aliwén si-kam i apo to. Tep sota apo to bengat i mebedin na mengikowan no kosto ono aliwén kostoy dingka ni sakey ya бага-en to. Jet sota maka-apo son Cristo, eg ira bedawen nen Cristo, tep toka ira pekedsang ni olay.

<sup>5-6</sup> Jet say sakey pay, sota eshom ma too, waray akew wa shaka ngidina; nem wára ngoy eshom ma too ja say wáred nemnem sha, kowan sha ey emin na akew, nan-i-inges. No manngidin man ono enshi, iso met laeng, ta sota toon waray akew ja toka ngidina, sota kayshedjawan nen Apo Jesus i wáred nemnem to. Jet sota toon eg manngidin, ja emengan ni angken nganto, iso met laeng ja kayshedjawan kono nen Apo Jesus i wáred nemnem to, ta eman-iyaman met laeng son Apo Shiyos nonta toka kena. Jet

sajay ngoy nemnem nonta eg mengan ni angken nganto. Nan-inges iren showa ja mapteng, nem say kowan ko son si-kayon emin, nemnem jo nin no ngarantoy koston pesing jo, no manngidin kayo ono enshi.

<sup>7</sup> Say nemnemen tayo koma, sota piyan nen Apo Shiyos, ta no metey kito, ono wára kitod biyag, si Apo Shiyos ngoreshan i makakokowa son si-katejo, aliwén si-katejon shorog.

<sup>8</sup> Niman na wára kitod biyag, mansilbi kito so nen Apo Jesus, jet no metey kito, iso met laeng ja maytodoy i tayoka pansilbi. Isonga angken niman na wára kitod biyag ono metey kito, si Apo Jesus met laeng i makatoo son si-katejo.

<sup>9</sup> Sajay i kabol la eteyan nen Cristo, tan nan-biyagan to mowan, say si-katoy Apo ira nonta wára pay laeng shi biyag, tan sota ira nanketey da.

<sup>10</sup> Jet emin kito, onsango kito so nen Apo Shiyos shima tinongawan to, jet amta-en tayo ma sota nanbanagan ni dingdingka tayo nonta wára kitod biyag. Isonga eg jo koma bedawen no ngantoy asen jon apil la wared nemnem ni eshom, tep agi jo met laeng sotan shi pamati; baybay-iyo.

<sup>11</sup> Sota isango tayo son Apo Shiyos ali, si-katoy kaytoshongan nonta esel nen Apo Shiyos ja naysolat nonta bayag da ja kowan to ey, “Sig-oradon wára-ak shi biyag, jet emin na too, sigorado ngon mantedimokod ira son si-kak, jet ikowan shay shayaw sha son si-kak met laeng.” Kowan nen Apo Shiyos.

<sup>12</sup> Isonga emin kito, no ngantoy dingka tayo, songbatan tayo di so nen Apo Shiyos.

<sup>13</sup> Jet niman ma, ibi-jag tayo sota tayoka pemedaw ni eshom. Mesepol la nemnemen tayo shorog i tayoka dagdag-a say aliwén si-katejoy kabol la kepoyan ni pamati ni eshom.

<sup>14</sup> Amtak ey mapteng nga emin i angken nganto; enshiy mesepol la en ngidinen. Jet naka pati-a ey sajay ngoy kowan nen Apo Jesus. Nem wára iray eshom ma too ja say wáred nemnem sha, kowan sha ey wára konoy singa ensekig jet shaka ngidinen kenen ono dag-en. Jet siya, sota toon sajay i wáred nemnem to, kosto sotan na panggidin to.

<sup>15</sup> Nem no sota agim shi pamati ket esakitan i nemnem to kabol nonta kinan mon toka ngidina, singa moka pan-ipa-sas ey enshiy semek mo so nontan na agim shi pamati. Isonga no sota mekan i kabol la kesheshalan nonta pamati ni agim, karam kenen. Nemnem mo ey say sakey ya kabol la eteyan nen Cristo ket sota kaysedakan nontan na too.

<sup>16</sup> Isonga say kowan ko, angken na wáray kanebengan mon mandeka ni sakey ya banag, pantanshaan ka, ta baka ngaaw i pengesas ni eshom.

<sup>17</sup> Ta say epateg koma ja nemnemen tayo niman na nayda-kam kitod pantoshayan nen Apo Shiyos, sota mapteng nga ogadi, sota talna, tan sota imdeng ja medepod Ispirito Santo nen Apo Shiyos; eg kito koma mansosongbat pangkep nonta emengidin ja eg mekan ono ma-inom.

<sup>18</sup> Jet no sajay i pesing mo, moka pan-onora

sota bilin nen Cristo, jet kosto-an toka nen Apo Shiyos; tan angken pay sota kait mon too, kosto-an shaka ngo.

<sup>19</sup> Isonga niman ma, say mesepol la menem-nem, sota mengi-kan ni olnos, tan mengi-kan ni kedsangan ni pamati ni eshom.

<sup>20</sup> Kareka memasig ja mengan ni piyan mo, no sotan i meneshal ni pamati ni eshom, ta sota pamatira, obda met laeng nen Apo Shiyos. Angken nganto, mebedin na mekan ja eg bedawen nen Apo Shiyos, nem aliwén mapteng i pengan ni angken nganto, no si-katoy kabol la kedismaya-an ni eshom shi pamati to.

<sup>21</sup> Say mapteng nga medeka, sajay. No sota pengan ni apag, ono penguinom ni adak, ono pandeka ni kompormi, i kabol la kepoyan ni pamati ni eshom, mesepol la maybi-jag.

<sup>22</sup> Say kowan ko, sota wára son si-kam, si-kato — no ngidinen mo ono enshi. Ta enshi ngoy naybiyangan ni eshom, no diket si-kayo ngo bengat nen Apo Shiyos. Say nemnemen mo koma, sajay: sota toon man-imdeng ni olay, si-kato sota toon enshiy to bedawen shorog ja toka dagdag-a.

<sup>23</sup> Nem no say sakey ya too ket waray showashowa tod nemnem to no aporbalan nen Apo Shiyos ono enshi, sotan na kowan to ey pengan to ni kompormi, eg to et ngo koma itoloy. Ta no itoloy ton dag-en, eg kosto-an nen Apo Shiyos, ta eg to inonod sota amta ton mapteng. Jet emin na dag-en ni too ja eg maytotop shi toka pemat, basol to sotan.

## 15

<sup>1</sup> Si-katejon etod-an ni kosto, ja makedsang i pamati to, mesepol la enosan tayo ira sota toon eg etod-an ni kosto, angken bimaki ira. Eg tayo koma ipilit i kosto tayo.

<sup>2</sup> Say dag-en tayo, sota mengi-kan ni pan-imdengan ni eshom, say onkedsang i pamatira, ta si-katoy panmaptengan sha.

<sup>3</sup> Ta angken si Cristo, aliwén sota pan-imdengan to shorog i ninemnem to nonta kawasha tod ja dobong. Say piniyan to et ngo mowan, sota kekosto-i nen Apo Shiyos. Isonga inenosan toy balaw ni too. Si-katoy kaytoshongan nonta naysolat nonta bayag da, ja kowan to ey, “Sota ngaaw ja kaledamsis ni too son si-kam Apo Shiyos, si-kak i engipedawan sha so.”

<sup>4</sup> Jet sota ira naysolat nonta bayag da, naysolat ja mengitosho ni panmaptengan tayo niman. Ta sajay iren naysolat i emengi-kan ni anos tan kedsang no timpo ni digat, say eg medingding i tayoka panshinel son Cristo.

<sup>5</sup> Si Apo Shiyos i kedepo-i ni anos, tan keked-sangi ni pamati, jet say shawat ko son Apo Shiyos, sapay koma ta si-katoy ontolong met laeng son si-kayo say man-i-inanos kayo, ja inges jos Cristo Jesus ni dingka to.

<sup>6</sup> Jet no sajay i pesing jo, emin kayo ma, manseksekey kayo ja mengiredjaw so nen Apo Shiyos ja Ama nen Jesucristo ja Apo tayo.

<sup>7</sup> Isonga say kayshedjawan nen Apo Shiyos ja dag-en jo, ibidang joy sakey tan sakey son si-kayo ey kait jo ira; karejo ibiyang i eshom. Ta si

Cristo, inewát shakejo ngo ja too to ma; eg tokejo inbiyang.

<sup>8</sup> Karejo dibkan ey aliwén sakey bengat i pangkep nen Cristo nonta inbetkag nen Apo Shiyos ja en mengitosho so nonta ira Hodiyo. Dimaw ali say ipa-sas to ey si Apo Shiyos ket agpayson tongpalen to sota kari to nonta bayag da so nonta ira apo sha.

<sup>9</sup> Nem say sakey pay ja pangkep to, say si-kayon aliwén Hodiyo, manshedjaw kayo ngo so nen Apo Shiyos pangkep nonta kaasi to. Si-katoy kaytoshongan nonta naysolat nonta bayag da ja kowan to ey, “Manshedjaw ira ngoy aliwén Hodiyo son si-kam Apo Shiyos, jet mekired-jawak son si-kara, jet mekikansiyonak pay son si-kara ja man-iyaman son si-kam.”

<sup>10</sup> Wara pay i inkowan to, ja kowan to ey, “Pan-imdeng kayo, si-kayon aliwén Hodiyo, ta mayda-kam kayo so nonta ira sigod ja too nen Apo Shiyos.”

<sup>11</sup> Jet wara pay i kowan to ey, “Pan-iyaman kayo so nen Apo Shiyos, si-kayon emin na aliwén Hodiyo, tan aliwén si-kayo bengat, no diket emin na too, man-iyaman ira son si-kato.”

<sup>12</sup> Jet wara pay i inpadto nen Isaias nonta bayag da, ja kowan to ey, “Wara aliy mengibengon so nen Ari David ja anak nen Jesse, jet say itorayan to, sota ira aliwén Hodiyo. Jet sotan alin mismo i panshingan ira nonta aliwén Hodiyo.”

<sup>13</sup> Jet say shawat ko son Apo Shiyos ja kedepo-i ni namnama tayo, sapay koma ta si-katoy mengi-kan son si-kayo ni ebadeg ga imdeng jo,



tan talnayo, ni joka pemati son Cristo, jet sota Ispirito Santo nen Apo Shiyos, si-katoy ontolong son si-kayo, say asdeg toy koston panshinel jo son Cristo.

*Asdeg to lay inkowan ko, nem iyay pay i eshom*

<sup>14</sup> Si-kayon a-akik shi pamati, enshiy showashowak son si-kayo, jey mapteng may ogadiyo. Asdeg to may amtayo pangkep ni pamati jet edaing kayo ma ja mebedin na itod-an joy sakey tan sakey son si-kayo.

<sup>15</sup> Nem intoled kon engikowan da niyay son si-kayo say eg jo dibkan. Si Apo Shiyos, ki-naasi-an towak ja inpanbalin towak ni apostol nen Cristo,

<sup>16</sup> jet naka mansilbi so nen Cristo Jesus niya naka pengitoshon so nonta ira aliwen Hodiyo pangkep son si-kato. Naka mansilbi ja singa sota parin para akan ni daton; nem say inpasing ko, intorok sota mapteng nga shamag ja edapo so nen Apo Shiyos, say ewaten nen Apo Shiyos ira sota aliwen Hodiyo. Jet inewat to ira ta singa indaton sha shorog i bakdang sha son si-kato, ni intolok sha so ey sota Ispirito Santo to i mengitoshong son si-kara.

<sup>17</sup> Jet siya, asdeg ton tinongpal ko sota obda ja inpiyal nen Apo Shiyos son si-kak; nem aliwen si-kak bengat i maka-obda niyay, no diket wares Cristo son si-kak ja kaontolong.

<sup>18</sup> No sota maypangkep ni obda ni eshom, enshiy nak ikowan. Say amtak bengat, si-kak i inosal nen Cristo ja mengewis ira nonta aliwen Hodiyo say memati ira. Jet siya, emati ira tep

shaka ipateg sota inkowan ko, tan sota itsora ni biyag ko.

<sup>19</sup> Inon-an sha sota milagron dingdingkak, jet sajay, inewatan sha ey edapod panakabalin ni Ispirito Santo nen Apo Shiyos. Isonga inekad ko ira jay ya dogad, manshokid Jerusalem ingkatod Ilirikom, jet intorok ka emin shiman sota mapteng nga shamag pangkep so nen Cristo.

<sup>20</sup> Ta say wared nemnem ko, say topogen kon dogad ja nak pengikowanan ni mapteng nga shamag pangkep so nen Cristo, sota ira dogad ja enshiy to intenteneng ja maypangkep son si-kato. Ta ekak koston ta-kepan sota obden inshogi ni eshom.

<sup>21</sup> Say piyan kon dag-en, inges to sota naysolat nonta bayag da ja kowan to ey, "Sota ira eg en-gitneng ni maypangkep son Apo Shiyos, amta-en shen mismo, jet ewatan sha pay."

<sup>22</sup> Sajay ya naka pengitosho, si-kato nin i kaontaktak son si-kak ja ekak dawān da son si-kayo, ingkato niman.

<sup>23</sup> Nem niman ma, ta eg sha-ak mala mesepol shiyay iren dogad, mebedin na idekjas ko ira. Saja epalabas den pigen tawen, piyan kon ondaw da son si-kayo,

<sup>24</sup> jet niman, mebedin emo ma. Isonga ninem-nem ko ey manshedanak da son si-kayo ni idaw kod dogad ni Ispanjol. Jet meki-iyanak son si-kayo ni sankatikan say meki-adibayak son si-kayo jet asen joy ida-jat kon ondaw shi dogad ni Ispanjol.

<sup>25</sup> Nem niman, ondawak nin shi Jerusalem, ja nak i-akan sota inedos min tolong so nonta ira

eshom ma ematid man.

<sup>26</sup> Ta sota ira ematid Masidonia, tan sota ira ematid Akaya, mapiyan iren mengi-kan ni tolong sha so nonta ira nankebiteg ga kait tayod pamati ja wared Jerusalem.

<sup>27</sup> Ireka eman-imdeng ja mandeka ni sotan. Nem say agpayso, singa waray otang sha so nonta ira Hodiyo, isonga mesepol la ontolong ira son si-kara. Ta sota ira aliwen Hodiyo ket say nayda-kaman sha ni mapteng nga kon-oren ni too nen Apo Shiyos, sota ira Hodiyo. Isonga mesepol ngon onsobadit ira ni kasapolan ni Hodiyo shi biyag.

<sup>28</sup> Nem no meksheng iyay ya dag-en ko, ja idaw ko sotan na alos sha, onshalanak mala son si-kayo ni idaw ko la shi dogad ni Ispanjol.

<sup>29</sup> Jet naka namnama-a ey sajay den panshedan ko son si-kayo, asdeg ton kaasi-an shakiton emin nen Cristo ni timpon kawashak son si-kayo.

<sup>30</sup> Iyay i kekshawen ko son si-kayon a-akik shi pamati, tep sankagait kiton emati so nen Jesucristo ja Apo tayo, tan saksakey pay met sota semek ja wara son si-katejo, ja edapo shi Ispirito Santo nen Apo Shiyos. Dilikaro aliy kasesaad ko et say mebedin na itolong jo son si-kak, sota panshewat jo son Apo Shiyos para son si-kak,

<sup>31</sup> say eg sha-ak an-ano-en ira nonta eg emati shi Jodia, jet say sota alos ja idaw ko so nonta ira emati shi Jerusalem, ewaten sha, ja enshiy sha ipangkep pa ngaaw.

<sup>32</sup> Jet balang nem metodoy ja onmotokak da son si-kayo ja eman-imdeng, no si-katoy piyan nen Apo Shiyos, jet say onka-jas ma i deknak ni

i-asas takejo so.

<sup>33</sup> Jet say shawat ko pay, sapay koma ta si Apo Shiyos ja kedepo-i ni talna, si-katoy wára ni olay son si-kayon emin. Siya, satan da.

## 16

<sup>1</sup> Piyan kon i-am-amta son si-kayo da shiya solat ko sota biin si Pibi, ja agi tayod pamati. Si-katoy para tolong so nonta ira emati shi Sinkria.

<sup>2</sup> Awat jo ja mekikadwá son si-kayo, ta si-katoy mapteng nga dag-en tayon san-a-aki shi pamati so ni kait tayon too nen Apo Jesus. Jet no ngantoy mesepol to, tolongiyo, ta si-kato, asdeg toy tinodongan to, jet angken si-kak, tinodongan towak pay.

<sup>3</sup> Pakikowan jo lay semek ko so nen Priscilla nen Akila. Inges ko ira ja emansilbi so nen Cristo Jesus.

<sup>4</sup> Jet nontan da, inpakat sha pay i kabaalan sha ja memiyag son si-kak, ja angken pay ya istay biyag shay onsongbat. Jet aliwén abos kon eman-iyaman son si-kara pangkep nontan na mapteng nga inpasing sha; angken sota emin na aliwén Hodiyo ja emati, ja wáred ka-ili-ili, ireka ngo eman-iyaman son si-kara.

<sup>5</sup> Pakikowan jo pay i semek ko so nonta ira emin na ematin emesa-nop shima baley nen Priscilla nen Akila, jet angken si Ipinito, ja pilmiron emati so nen Cristo shi Asiya.

<sup>6</sup> Jet emin ira jay ya totoo, pakikowan jo pay i semek ko son si-kara: si Maria ja ebadeg i intolong ton panmaptengan jo,

<sup>7</sup> tan si Androniko, nen Jonias ja kait kon Hodiyo; si-karay kait kon naybalod nontan da. Sajay ya showen too, si-karay sigod ja am-amta ira nonta eshom ma apostol, ta epangdo iren emati ey say si-kak.

<sup>8</sup> Pakikowan jo pay i semek ko son Aplias ja epateg son si-kak shi pamati,

<sup>9</sup> tan si Urbano ja inges min emansilbi so nen Cristo, tan si Istakis ja epateg son si-kak,

<sup>10</sup> kasta met si Apilis ja na-amta-an ey emepiyal la mansilbi so nen Cristo, tan angken pay si Aristobolo, pati sota pamilja to.

<sup>11</sup> Jet pakikowan jo pay i semek ko so nonta kait kon Hodiyo ja si Hiredion, tan sota ira emati ja wared pamilja nen Narciso.

<sup>12</sup> Pakikowan jo pay i semek ko so nonta ira eman-obda pangkep so nen Apo Jesus ja si Triposa, tan agdalo si Pirsida ja epateg son si-kak; si-kato, asdeg toy inobda to pangkep son Apo Jesus.

<sup>13</sup> Tan si Ropo ja sakey ya kamaptengan i ogadi to so nonta ira emati, tan angken pay si ineto, ja naka ikari ngo ey inak.

<sup>14</sup> Pakikowan jo pay i semek ko so iren jay ya totoo: si Asinkrito, si Pligonti, si Hirmis, si Patrobas, si Hirmas, tan sota ira eshom ma a-akid pamati ja wara son si-kara.

<sup>15</sup> Si Pilologo, si Julia, si Nirio, tan sota agi ton bii, tan si Olimpas, tan sota emin na ematin wara son si-kara.

<sup>16</sup> Ipa-sas joy semek jo ni sakey tan sakey son si-kayo. Jet angken sota ira emin na ematin emesa-sa-nop ja wared ka-ili-ili, piyan shen

pekikowan ko ngoy semek sha son si-kayon emin ja emati shita Roma.

<sup>17</sup> Shewáaten ko son si-kayon a-aki shi pamati ey tanshaaniyo ira sota eg makakosto nonta koston toro ja naytoro son si-kayo, ta si-karay emengi-kan ni eg jo pan-inawatan, tan kaond-ingding ni pamatiyo. Arawí-i jo ira.

<sup>18</sup> Ta sota toon sajay i aramid sha, aliwén si Cristo ja Apo tayo i shaka pansilbi-i, no diket say shaka nemnemnema, sota pipiyan ni bakdang sha. Singa agpayso i shaka ikowan, nem emengantiyok bengat, nakol ni sota ira toon ma-onod, inam-ay ya may-owapan.

<sup>19</sup> Angken sipa, amtara sota maypangkep ni pamatiyo, jet si-katoy naka pan-imdengi. Nem mesepol la tanshaanan jo ira jay, ta no itenengan jo sota ikowan sha, sotan i amta-an jo so ni ngaaw, jet piyan kon sota mapteng bengat i amta-en jon dag-en.

<sup>20</sup> Jet no dag-en jo iyay, si Apo Shiyos ja kedepo-i ni talna, ipalobos ton ebaken jo shagos ira jay ya too nen Satanas, ja singa mebedin na ikatin jo ma ira. Jet say shawat ko son Apo Shiyos, sapay koma ta si Apo Jesucristo, kaasi-an shakejo say amtayoy pesing jon onsongbat so iren ja apil i toro sha.

<sup>21</sup> Si Timoteo ja kadwák ni sajay ya obda, piyan ton pekikowan koy semek to son si-kayo, jet angken sota ira kait kon Hodiyo ja si Lucio, si Jason, tan si Sosipater, si-kato ngoy kowan sha.

<sup>22</sup> Si-kak si Tirsio, ja inpangisolat nen Pablo niyay; piyan ko ngon ikowan i semek ko son si-kayo.

<sup>23</sup> Si Gayo ja nanshiwesan kod jay, piyan ton pekikowan koy semek to son si-kayon emin. Shiyay met laeng i kesa-nopi ni emin na ematid jay. Jet angken si Irasto ja trisoriro ni siyodad, tan si Kowartos ja agi tayod pamati, piyan sha ngon pekikowan koy semek sha son si-kayo.

<sup>24</sup> Jet say shawat ko son Apo Shiyos, sota kaasi nen Apo Jesucristo, ja wára son si-kayon emin, sapay koma ta si-katoy ma-shoman. Siya, satan da.

<sup>25</sup> Niman, mayshedjaw koma si Apo Shiyos, ta si-kato bengat i makabaal ja mengi-kan ni kedsang jo shi pamati, jet say toka osala ja emengi-kan ni kedsang jo, sota naka itoro ja kosto pangkep so nen Jesucristo. Istay ya enshiy maka-amta so niyay ya sigod ja nemnem nen Apo Shiyos nonta bayag da, tep eg to inpa-amta so ni angken sipen too.

<sup>26</sup> Nem niman ma sotan na istay eg tayo amta, nappa-amta ma son si-katejo jet emankaitosho shi intiron dobong, say amta-en sha, tan say si-katoy onoren sha. Jet mika ibatay ni olay nodta insolat ni para padto nonta bayag da. Si Apo Shiyos ja wára ni olay ingkatod ingka, sajay i inbilin ton medeka.

<sup>27</sup> Isonga mayshedjaw koma si Apo Shiyos ni olay ingkatod ingka, ta si-kato bengat i maka-amta ni emin. Mayshedjaw koma si Apo Shiyos jet si Jesucristo komay kabol ni kayshed-jawan nen Apo Shiyos. Siya, satan da.

**Dibshon Mengi-kan Ni Pansigshan  
Ibaloi: Dibshon Mengi-kan Ni Pansigshan (New  
Testament)**

copyright © 1978 Wycliffe Bible Translators, Inc.

Language: Ibaloi

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

6f85e932-8eee-5911-b890-a31a1da75d8c